

Kotavaxak dem suterot

Raymond Radiguet

**ORETLIK
KOE ALTO**

Berpot (1923)

Kotava, tela tamefa golerava

KOTAVAXAK DEM SUTEROT

Raymond Radiguet

**ORETLIK
KOE ALTO**

Francaṽaf berpot (1923)

Kalkotavaks : Laurent Lermigny (2017)

Raymond Radiguet : francaṽaf suterotik (1903-1923)

Va jontika culimera fu jintú. Voxen va tokcoba rotaskí ? Kas golde jin kase ba abic aksat poki kogejara tiyí santoldaf ? Ape jinafa dilizesa skaltewera bak bat volgubef ugal tiyid ke inda gimesatolena ba mana klaa ; voxen larde mecoba lieke tuguazasa nekev awiaca sotir, to wetce sardik xuton gu stuva di golinulayá lize ayik co zo tokteyer. Me tí antaf. Isen setikeks ke jinyon palik icde ban ugal me titir milaf gu tel ke abdif korik. Kontan ixam sates va jin, gogestir dacoba geja tove jontik sardik tiyir : tilderugalafa balemda.

Koe F- widava, kene Marne kuksa, sokeyev.

Gadikeem va aotcafa pusuca lodamon lanzayar. Pestapuve, sokoblise do min is va int guwiiskase, voneweyer lodame solelaweyer.

Sometí klokesek. Koncoba nutisa klok sedme artan, i sedme kontan loon folidjaf, sedme jin nutir ageltafa lion dam bluda sedme karvol, nekev trivafa biota. Neken biota krulder.

Batvielu biota empower, pune karvol sokimpavantar, kore to felisik empar ise va nuba volins vangaber.

Kali san-tolda mekon al fiaé, vaxe va sardya yoltkirafa gu Carmen, i gu tela staksema gan jin kan lojotafe velikye va twa lize va jinafa rena koeon muxayá. Batinde roverenayá nume kakevetcadayá. Jinafa twa pu in ba riel abdi lanira ko bema zo deayar. Va antafa sardikya vektasa va jin kir parvuafa al solwiyé, isen ina do beryama ko bema gilaniyir, dum jin do beryeme. Enide bat toloy vrutasik di stivaweyed, va sintafa yerumara gestiyí, laninde. Acum va twa ke berye medjusutese ta Fauvette W^{yama} gu jinafa twa zokeyeyé. Pu berye va jinafa

anamkalira diveyé, is va cinaf ervay uzeckes kev toloya milklaafa berikya is dem cugunaykapafa yoltega. Ve tiyí gabentaf wison da va riganya ke Carmen me al kunipayá viele vani miafizestura do gadikeem gigarumbes va jin is somebuzegas ko pula gin laniyí.

Moida palik ben bugi rundanyad, voxe jin tigris katice pulaxo is kurdanyes naritison kou brost va konaka karba ta volunt belira wetce taneik, bema gadesik kolaniyir. Ravesik ranyad. In va twa koe nuba giyir. Jinaf nimateem wayawer, karba lubeweyed aze treduyú, edje gadesik pu tavesik dokaliyir. Ixam, vayasik moe taneafa starka van jin kerukaf arte pulaxo rwodeyed kire va jinaf yolt tinteyed. Tere, gadesik va jin rozayar, aze gedelon pursatason vols nekison va rietaja ko kon bemik, bam sendayar kire va roliskafa twa dem san-toloyu bu al suteyé. Eruyur kase miv ant al suteyé aze djiayar da ko bazaxo di radimelaniyí. Me laniyiv. Koe kusk leve tcanda va jin riduyur. Torigiyir da rotplekura va sardikya (inaf gadikeem va jinafa twa pu in al goleyer) tiyir tegi astirbafi lion dam falura va tweluxok, numen batcoba va jinaf lidopaf stravok ve skaltepeyer. In dratceyer da va bat eluxok den jin fu stakseyer. Voseyé da meinde di askiyir. Xaayar voxe kaliyir da va twa di videyer ise ba taneafa tolaskira va jinafa linularaja mea ropalseter.

Bata aotcuca dem arouca is vazuca va intikeem xayeyer ise coeyer, milinde koe bema jinafa drikuca jupayar da gu ravesikany zo krupteyé, i ageltafa vunguca.

Ko pulaxo gin kolaniyí. Tavesik beonaf va jin gu Don Juan yoltayar. Zo derbepeyé, moekote larde yolt ke grabom grupen

gan jin vols kon palik zo ozwayar. Inafa « Va Don Juan kiavá » ewa isu dofugafa kicera va pulikeem mu jin di artazukayad. Rotir ixam al grupeyer da va rumeik ke omafa pula ta burera va twa pu « yikya » al vajgeyer, i pu « yikya » inde bemik kan olgaf avot gikalid. Yolt ke bat rumeik tiyir Staksasik ; volto nope yolt al narayá, neken bat yolt va jin al dirnuyur.

Ba tane bartiv, va gadesik al voseyé enide in va mecoba pu gadikye di kaliyir ; ba baleme braldeyé da va kotcoba fu pwadeyé. Mecoba va jin blagayar. Va bata welidara paton gu ronjuca co plekú. Grupeson da gadikye me di mibuegayar, sopron zo felbeyé kiren ine va jinafa sega fu grupeyer.

Nume welidayá, intotcon lopekuson da gadesik va belikafa tixoluca al abdiplekuyur (dum pu milgik). Gadikye djugrupeyer kase va bat renaberpot koton me al glotcayá. Ine den gadesik laniyir. Bak bata worara va coba fotisa liona katecton pulviyir.

— Va tokcoba ? ~ gadesik akoyen is argepen kaliyir. ~ In va batcoba al pwader ? Al voseyer da stivawé, kalison da edeme gan rin co zo aytar.

Bata rotuxadara ke gadesik va ine skaleyir ; va jinafa ayikyefa grijuca ware webeyer. Va karolara ke palikeem is miabuditera ke tavesik vere wayá. Gadesik va vidjera palseyer. I kimitik va coba ixam jinon grupena me grupeyer : gadye, lemisteyene gan inafa linulara, al kiblayar da va bemafa tanda di tenukeyé aze dimon di zo nariyí. Batcoba bam tiyir tozi teveaksat. Gadya kuraniyir da jinaf waks iku gablexa me di zo turestayad, batdume keyer enide va trakuray moi xolera di

kaliyir. Ba bat viel, tuke memalyaca ke gadesik gojon kivas va keskeem ke dilintaf rotuxadaks, antaf ke pula va moavafa sona mbi zilukeyé, i sona riwena gan seotasik va donaf waks. To patavaraja : bema va toloy lokiewaf vayasik drasuyur, kiren gadikye ke seotasik va donaf waks va nazbeik di tiolteyer.

Yon vayasik dum cin va vigrokasik ta jekura va yonar zanudayad.

Gadya malyedayar da tiyí jotarsaf ta vayara dene Henri-IV olda. Koe inafa swava, batcoba sugdalayar : ta koyara kan impadimak. Acum dene mona toldon zavzagiyí ise ant kobayá.

Va kimiskafa daava pu int abdiplekuyú, kire lajuraplekuson va kobara bad bale moy bartiv voldum tolda ke jinyon savsaf milbemik, tiyí nuyaf bak loon afizacku. Kene Marne kuksa ant gibegozayá, i kene Marne en tisa cinafa kuksa eke pulvison va Seine, berikya kaliyid va « ara Marne kuksa ». Va tota ke gadye dace rundanyayá, nekev inafa poure ; voxe me detceyé ise me welidayá da jinafa vudera me tiyir tela ke volvegera vols vuda. Gibeliyí, ranyes koe bata tota. Bak 1913 is 1914 va toldecemoya neva koeon al belí. I me va nuve bata nevaja vols ape tela lokiewafa neva, icle sedme riwedara lodam swava. Acum vamoion, ba klaa edje sardik va olkoy ke Raltadukaf Nevak givligur, pune va sinafa rumeafa mempera toz grivuteyé, beka batugale vaon vol djubeliyí.

Troy ke batyona zexara goatesa gu kobara tiyir da batcoba va varafa tanda gu rolaf tilderugal artazukayar. Acum, jinafa vieleafa kobara tiyir abiccoba, voxe larde leedje dam artan kobayá ise bak tilderugal ostik kobayá, pune bata abiccoba tiyir

uxadaf tiracuk viden remi blira arte ault beka tce va tanoy aksat dem milka co abdualbayar.

Ageltaf tilderugal vanfiyir voxen trumansayá larde tove jin tiyir mila dilizera. Karvol va bluda valeve biota wan disukeyer. Voxen geja sokiyr. Va biota empayar. Felisik va arcoba di goviusuyud numen karvol wauneyer.

Ae, kottan koe Franca wauneyer. Rumeik, dem gablesa neva leve ma, lente finta tandeweyed. Vayasikaj va grivodjura va yasa impavantayad.

Kotvielon vani sielestura, ko J- golda arte toloye decitmetre denu cin laniyiv, witison va sayakaf impadimak pokolapis. Va tcalarna divbureyev aze pu sayakik kalkabuyud. Awemkirikyva va keravor ko menk gimayad ise va jontik inoc mo etol vilunden gu imwa malpleyed. Bata varafa belca va tcatyafa setikera den jin isker. Isen meviele manote vor zo mogrebeyer isen imwa zo vanmimayad. Va dilkeem ke mona gu nilt udayav.

Fure ko J- mea laniyiv. Jinaf berikeem va geja toz sateyer, kruptheyer da ina tiyir jijarsasa. Va biradom pu sin pouyur. Gaveon gimodeyes, berik va fela ba teve bartiv re golusteyed. Kimtafa zexara ! Voxen moni tol-sane ke anyusteaksat, bat jotaf rostazik gin pokoled. Terektason va gadye pulvise va mallapira bene azega zavzagid lodame bulud lize milgik vangaved. Ape meka liziba mea zo rodadir. Kan tolkrafol ilon fu gokoyat. Berye va beryama kranded. Xakola ke inaf krafoleem tir vas lowe balem-sanoye decemeametre : « Va rin antaf moe vawa isketev. » Berya buwejer. Voxen mana seramuca ta ernigera va tolkrafol ! Mea vunguca. Draged da va tel jinaf fu dimempad.

Grupeteson va warzot, mali vanafiz ranyad. Edje kottel destar, va vrati ke bata gugafamuca tere kosmá : koyara kan tolkrafol ! kal bira ! is bira sumefa loon dam gilton isu listafa. Lokalion lapitison, va Paris co anteyayad. Coba tueaftasa va Europa al vanpiyir sinafa tanafa pokolera.

Kas ketsuca ke rumeik tir amidafa gu tela minafa ? Idulugalon koe tawaday, va muvara girotapsat, voxen midusik imaxud.

Sokira ke dubist voldo darefa wica sotir riaca. Osterafa bilmara, xeftoara ke Caillaud arpeo va merokagaellan alpoz zeitafa gu testuca anamgimayar. Acum jinafa ageltafa setikera va geja tir abdi geja.

Batinde :

Berye is jin va tan vegungik yoltkiraf gu Maréchaud balgeyev, i va vertovik, i va klodik dem batakaf is djimotkiraf lukastam, i va dotapirdotik. Kottan gu Maréchaud gadikany dayoltayar. Beka keveon sokeyev, vol rovekiavayav numen in riyomepeyer jontikeke beomason va cin moe vawa lanviele domuyur aze kaliyir : « Ex kle ! va dotapirdotik me kiavac ? » Yateyev. Mali bata eskarnaca, plabura zo kabudayar. Voxen va tokcoba dotapirdotik kev cin rotaskiyir ? Koulanison va bema isu kolanison, berye va inafi mamlesiki impayad, pirtapon kiren vakol co tis ke jinafa klaa tiyir merokivan.

Darekeon. Bak dareviel ke 14/07/1914, lanison van jinyone berikye, evodara tir gijafa viele va tari kabdue polku ke Maréchaud wí. Konaka basgamayana frumba va garia arte matela palsejed. Mali tole kielbartiv, inafa kwikya vanpiyisa oviskafa moe kepaita al gelber ise vol djuprotitlanir. Ixam Maréchaud yasa, kovudana gan bilita, va telvungeem al buder maninde folve ke bat oviskik moe kepaita gan nutisa jovlenuca ke mona zo laumar. Korik iegad, exuked da felisik va mecoba ta giwara va bat kimtik sopud. Inya moe mikiya lopcer, beka meinde nutir izakotik. Batlize wan djuzavzagí, voxen cinaf kwik stakseyen gan gadya artlanir azen ta kobara gomallanid. Edeme va jora al co zelá. Ton awalk koe gloga mallaní, ise va Lorik bliké enide kwikya moe kepaita wan tigitir viele va gadye ko golda aneyatá.

Wan tigr, voxen ríaf lanisik mal Paris ta sielestura az tcokera va sirta ampud. Acum va tanoy ewaraf verast puon anton kaxaad.

Ostik, batvieli, tove kwikya, batcoba anton tir loleon sanegafa abdirsera. Ina ba siel tozuweter, kare favuca, dem afifa gumurda tazukasa va ageltucaf stirk. Tel ke ikpa is tel ke atela belcon tid, kiren Maréchaud wetce strabik va koafira me al rovenyuger beka nugracer. Puda ke battanya va tacuke ke bata mona ke gomil webeper, i ke ayik dem ezas usuk gozas moe kepaita dum niltkirafa azeba : i puda meayafa is laridafa is pibafa eke va wilalma askir.

Kevfirdesik koe dotama tid « kuranik », va arcoba vols fird afizcekon giviunsud. To vrodbildesik ok lupasik ok ludotiasik tid aze vani kobara artlapid aze fu artfirdad ede fird miv me al

grirunkawer. Mali tixara, cinaf kevfirdesik va teca bulafa ervolita fiesa ik tiusa ik mielon enintesa ostik al tazukad. Bat budik tere artlanid aze va tari ludzed.

Ayikya abdulnir. To kurenik ke dotapirdotik kevelaf gu Maréchaud tir ise mali konaka wexa va oviskikya lorason forendar. Pu redakik juiker : « Lagal da va ina zijnon askipel !! Bata kintikyama en tir volkalafa, koe bata mona lize dun zo alier. Ison, ede kivara va divkobara num tira a rundak va mana tegira jupad, pune kalil da va ina den jin di kokobatá !! Va inafa kuba jontolatá. »

Bata lorasa sodura va rotakafa keska den tari askir. Weltikya argar. Tari va gralomera anton trakur. Kevfirdesik, oton gu teva, va polku urped, va mona ivamudad, kotliz ticumason. Voxen vielu tan mo kepaita awir, pune walzeteson va kosik tari toz taspugar, dum rumeik pu Guignol.

— Stivawec, en !! ~ weltikya iegar nume va « To tan vanlanir ! To tan vanlanir ! » eviegara lular.

Ba batyona iegara, oviskya va mikiya vangir aze va tana mo atsa ke kevfirdesik artteriges va verol kalmimar. Tel aluboy ar vere titlanid.

Edje mukerma is embela is kapaliez moe Dotaxe viga arubad kire va dik anelik wid, remi miel edje kazawaks co gotir wemtackaf, tcoketeson va tcabanera laof sotik va rebava urped aze mo preima tanded. Oviskya va konakcoba vulkutuna kalir, trobindason kexapon dum viele ovesa lanera pu puda sozilir ise kottan rokler. Sotik abdialbas va bata disukexa gu kapa, va puve soe djupendad. Acum, skotceson kivason va gralomera va

oviskya bak intafa gracera, ta etsa moe intokol govovulted. Konakar loproyaf, rundanyayas moe gama ke frumba dum ta ingoy ke Vincennes, va tcafeý ik tuivuro anton anteyad.

Va polera ke Maréchaud tolonga gestit, i ke korik deneon kobudeyes, vanmiae mana lorara is bat afigeem.

Dotapirdotikye, kurenik ke sodusikya, waganyese moe rebavama ke polku, va dewitca icde vudesuca ke pilkotik luwir. Zo permur.

Folison da to int zo permur, oviskya kiavar, dem konaka mikiya leve meem, edje va tana kevmimar kotviele kona atsa jowikar. Ton meayafa puda ina grewar kire tere zo gildar. Va kona yikya, i va tcordaf redakik, ant zavzagisa moe tota flaydusa trakú.

Tari tcastawer, legamafi. Do gadye al zavzagí edje gadya va arak ke yasa van gurakoliavafa embela star, gardieteson va djumera va takrarotok ke rumeik. Efe, va bata divulgara olegara loeke dam bete berye satolecké. Albá kotviele jinafa takra lokalion is mevexon yarter. Voxen refa disukexa ezlapafa va jin loeke keldaskir. « En til zwapaf », gadya al kalir. Va tcatey al yontá. « Sin gu jin va kusafa uka nekid », al dulzé.

— Neken kiva da batcoba va in fu woerser, ~ ina pu gadye kalir.

— Ox, ~ ine dulzer, ~ metel loeke tir meropestales. Va betcoba rodisuker, vaxe basalman libol.

Gadye va batcoba al kalir enide zavzagí. Voxe gruper da bata disukexa va jin fu romplekur. Pestalé da va ine dere askir.

Erú da ine va jin mo epiteem plekur enide lokiewon wí. Ae toz krezé, nimateem va jin mea burer.

Re anton mon tol-sanoy korik wan tigid. Va semint gildev. To farura dem teyok tir.

Decemoya tilderda va oviskya laizon koafid, milinde afigasuteteson va warzaf bitej radimi zijnafi afi ke stirk magnel vinustar. Bam, tegulason va nubeem ton donera, is folison va tena ke tamava ok fure vannarira, ina mou kepaita va int mimar, va trivaga lubeson empar, ton mayakafa nokodara, aze mo avlak kum rapor stokewer. Batvieli va kotcoba vol al tabí, beka jinaf oblakeem nolieyer ise takreluca va jin graceyer. Voxen gildason va korik iegas : « Ina wan blir », ve krezé nume mou epiteem ke gadye luber.

Gribindeyes domon ic Marne gan ine zo dolizí. Gavepon zavzagiv, amlitason, senyes koe werd.

Dimlanison, va batakafa brucka kadime polku fowí, i va tacedik ke kwikya ! To Maréchaud gadikany dem kiltaf gom tir, nyases va voyeem, va intafa trivaga, is va yona mikiya, is va preima, is va intyono imwaxo, is va avlak kotraf gu fortey, is va intafa vilayana targuca.

Va batmana zixa karaké kiren ina jupar da va divulgafa rekola ke geja loon dam kotar gildat, isen jontikeke gan ezla ke debala lodam loske zo pedrar.

Va buli gildev. Lyumara poke Meaux dilized. *Uhlan* okolsayakik poke Lagny arte san-aluboye decitmetre vane cin nuve al zo gralomed. Edje jinafa ziavikya va nikya otceyesa

mali toza is kotawayasa va yona varla isu bor dem widiovu lev matela pulvir, pune pu gadye va mergil to divburera va cinyona savsafa neva erú ; to bata drasura tir tela jinafa lozolonafa puidera.

Tere, viele djuprogotcev, pune fela givad da batcoba tir mefavlafa.

Re, jinafa berikya ko J- gilton lanid ise va kita dem efte pu bakanik bured. Va ae rotakafa grikidara va intyon atitsuyus listaf azed al kosmad. Kotviele va J- artlanid, pune kita tid riwe vlardafa !

Va Henri-IV olda fu kofiyí ; voxen gadye abdualbayar da koe tawaday tandon wan zavzagiyí. Remi bat brigaf idulugal, jinafa antafa suskera tiyir kotviele ko feladolexe vulteyer, laneteson va seotara va tanoy tulok ke *Le Mot*, i ke fela puvesa va jin is sosanegana ba pereaviel. Ba kotbat viel waveon ranyayá.

Voxen imwugal artfiyir ise va jinyona taneafa zobarama tuitupayar. Yontason va axoferá, remi bat imwugal, ton taneavielafe blucte konakviele gozayá, do jotikya roneon. Va vim giyí ; bantanya va badona dem sugdeya. Mali toleafa axoferá, milfradjik al taveyed inde va manyon nuyaf afizcek rovodimpavantayá, i va afizcek kotviele do sardikya tigiyyí. Acum va cuga erba gazdon govokayestayav aze va warolaks pu tilikya bulkayav aze afizcekon fiaeteson mo datca ke Chennevières laniyiv. To taneafa toma tiyir da va nik dikiyí. Do inafa berikya djukaraxofeyé. To taneafa toma tiyir da do yikye abditcafe lion dam jin gilduyú, dace mafelason va inafa listuca

isu balijuca. Cinafa dofa vligura va milklaaf yikeem va cin ware tuyastayar. Ant cin malyedayav da va coba rodegildayav ; ise adim, ant cin fogetiyiv bagaliaf gu ayikya. Fogetiyiv ayikye. Bexe, me di zo solparsayav. René va Henri-IV olda fu kofiyir, isen koe inafa pula fu tigiyyí, i koe tela bareekafa. Sye va Ellasava me fu raveyer ; mu jin wetapayar, kevbuiveson va gadikeem enide di raveyer. Batkane remi oldugal belcon di tiyiv. Larde va taneafa tanda me al diskiiyir, gan batcoba gu pilkovafa loplekufa kobara zo ikavebayar. Gadikeem ke René mekon gildayar kire daretandon al fineyer da ine va Ellasava me fu vayar. In va keska ke jinafa turestucanya wiyir ise beka va inaf ar palikeem vol tabiyir, pune tiyí tanoy nik inon vanovan.

To taneafa toma tiyir, mek tiderugalaf viel ke bata tanda tiyir rusagaf gu jin. Kle dosteyé da kontan va intafa klaa somedivvawar ise dum opra jinafa wupekirafa vligura al jeweyer vielu kontan va jin al dulapeyer inde batcoba va jin katiyir. Cinafa dofa abdugara va kelda ton miala tutrelayad, i va kelda gonexuletena golde cinafa intotcuca.

Ba tozaviel ke bemaf cadim, René tiyir tciamaf nyapesik mu jin.

Do ine kotcoba vanpiyir puve. Abdion ant me rolaniyyí. Voxe re va zalor tolon vieleon djukamoolaniyyí, i va zalor wale Henri-IV olda is Bastille golda liz va impadimak rundanyayav.

Va barda batinde tiskiyiv, dem antafa nuca isu pokolera va fiaera ke alubeaviel do sardikya volgunon dafuna gan gadikeem ke nik. In va belcon nikye ke nazbeye is nikya ke nazbeya ta

kielestura ganeyer. Va batyona tarjama faluyuv voxe gan sinya yonton gu bevefara dere zo faluyuv.

Remi listaf cadim, gadye va jin is berikyeem gozapatason djukadostayar. Tan cinaf gelukaf mukot tiyir Ormesson is kenelanira va Morbras voa, i va kuksa mantafa gu tanoye metre is remenisa va werda lize imwa arlize merowina atrid, i imwa dem yolt jinon vulkuyun. Brixax ke tenjay ik eska va lavadom pu eglusa nuga palse. Tonga bak imwugal va konaka decitoya batakafa is raltadukafa vioma djaver. To brixaga tid.

Darekeon. Ba lan taneaviel ke balemeaksat ke 1917, dum jontikviele, va impadimak vane La Varenne rundanyav aze ko Ormesson lanitiv. Gadye kalir da koe La Varenne va plinafa yasa fu katrasiv, i va Grangier yasa. Va ina gruper kire va yolt ke Marthe nazbeikya koe estova ke trutcaginsa al wí. Lanviele, va gadikeem pulvis va worara ke lane Grangier weltikye al gildé. Bantan denlaniyir, dem liwayek kotraf gu grabom ke sananyustdafa nazbeikya. Marthe akoleyer. Inafe gadikye co djumeyer da inaf lavalingeke koe sodegasa ginsa co tigiyyid, i koe ginsa dikisa va jinafa gadikya wetce taneatisik. Bat lavalingeke tiyyid mebitonaf ; va vayasikany ke zovdasa tavera muxayad, i va vayasik yoysotces is frines va lingesiki.

Moe etol ke La Varenne golda, Grangier gadikeem va cin ker. Grangier W^{ye} isu W^{ya} cwe tid milklaafa, mon alubsandafa. Voxen Grangier W^{ya} nutir klaafa loon dam kurenik ; inafa meglabuca is raneme jupad da ina mali taneafa wira va jin mepuver.

Remi bata gozara, katcalá da dun woltsoayar numen inaf jo

gu ploz jontikedje zavzagis zo besar. Enide kot famint mepuves di tir teka va lana memalyuca pu int culimé, pune djumé da ina gruvdarson fu pulvir. Bantode va jin awuzar.

Gadikye, ine nutir sintaik, i savsaf levefayik sonteyen gan sayakikeem. Voxen toklize Marthe tigr ? Guzekason va gozara do inaf antaf gadikeem, skotcé. Ine kan diref impadimak fu artlapir, « arti bartivamu, kiren zdarion me al lajutir, ~ Grangier W^{ya} pebur. ~ Berikye doon artlapitir. »

Viele impadimak va golda konir, Marthe moe avlak ke omaze ranyer. « Keckel vieli impadimak vukir !! » gadikya iegar... Bata mexeyikya va jin memper.

Inaf gem opelapaf isu edji va inafa karolararsa va trakula ke megrupenik wazded. Va nuba ke rumeikye nutise san-tandafe gir. To inaf berik tir, i zwaf rumeik dem usuk ke imkirik, ton kota zatca relmesa va akola.

Moe kelda, Marthe is jin kabdueon laniv. Jinafe gadikye kadimeon lanir, wale Grangier yasik.

Jinafe berikye, do bat warzaf rabetaf palikam poub gu vultera, sine wirked.

Va Marthe gu inyon lavalingeke cpá, numen ine moron dulzer da sin tid remgudaks. Va zolonusa vol getcar. Va yona lokiewafa trutca pu jin neditir, i va « tumartigayana » imwa. To taneafa toma tir da vol kalí da bata teca imwa sedme jin tid kipeafa.

Leve edji va jin me rowickir. Jin va ine dizvé.

— Va rinafa gadikya me vektal, ~ kalí.

— Va batcoba dile mbi pulví ; voxen viele den cin lapitil, va afigasuteks va gadya jotafa nedití, vektapá.

Bata dulzera va jin tugabentar, numen va Lorik bliké enide va Marthe me wití viele ine titir milklaafa gu intafa gadikya.

Djutekason va akolukera ke bata portafa dulzera, is me gildason da ina tiyir portafa anton tove jin larde bexe Marthe va gadikya kan jinaf iteem wir, kalí :

— Batinde usukotason, kiovel, gasitaf usuk lokiewon co fudjer.

Zo tueaftá kire va mancoba pu ayikya meviele al kalí. Va jinafa usukotara trakú, ae.

— Pu gadya roterutul (dumedede govengar !). Loviele va int lokiewon usukotá, voxe ixam al gaveyé nume va toleaf impadimak vol djupobulfeyé. Ison va edji me djudeswayá.

« Toka teca yikya kle tir, ~ trakú, ~ lardetire doster da pelfudik icde inyon vikiluk kornar ? »

Va inyona suterotafa griva ladiepilé ; tí kalaf kiren va Baudelaire is Verlaine gruper, isen inafa albarinda va Baudelaire membrer, i albara soe amidafa gu tela jinafa. Va keviera koeon soltrakú. Gadikeem va inyona griva tere al doster. Marthe va in sater kiren batcoba tir nope krenuguca. Aguntanik, koe inyona twa, da inyona belira pu ine pulvir, ise va lanyona neva pirdar voxe va aryona pour. Va « Imweem ke Rotuca » puon al biur. Givanon gu inafa aguntara, volplinon zo

akoyé, voxe grupeson da ine va sayakik eskodaf kir kivas va Baudelaire vol vejer, wivecké. Pestaleson da bantan va Marthe jontikviele ape lemister, tí valeackaf. Kaiki taneafa volplinafa akoyera, va mana vwepuca wauné, loeke kiren ede in va « Imweem ke Rotuca » co grivuteyer pune co kiva da sinafa direfa kraba va tela ke « Awalkera ke Fertikeem » co vektatar. Voxen nué dacoba va jin rotikir.

Aguntanik va zovdas cultim dere al biur. Beka meviele nobá, pune dragé da va ine fu stá, loplekuson da banlize gikobá. Voxe, waroldon kivason va kosmara va jinafa rotuxara, djiá enide ine pu jinafe gadikye me di pulvir. « In me gruper, ~ kalí, ~ da va tavera va altovonera ika lanira den *Grande-Chaumière* gracé. » Me djumé da ine rotrakur da va cultim pu gadikeem palsé kire va wira va lebikeya mbi pou. Tí kalaf da birga wal cin inkewer, isen jin vazaf ixam pesté duxas va ine.

Dere tí oklaf kire gu tawaday zo abdualbá, neken va zikexa ke cinafa gozara men al aflav. Konakviele gadikeem va ine rozar : « Disukel, Marthe, roneon, maneke datca ke Chennevières tir listaf ! », oken inafe berikye vanlanir aze va yolt ke yestayana imwa erur. Ine va moobrara kaxaar umeke sin me di mibuegad.

Koe werdxo ke Ormesson debanyav. Ixakaf, batcé da maneke al abdufí ise va coba al titosipé. « Radimi lepestakafa is lotuwavafa prilara, ~ trakú, ~ va Marthe co robaalpé ise va rubuca ke gadikeem co rojekú, kareizuson va lekeugal ke bata wida. » Agié. Va lazavanya fogí ise trakú da, kaiki kotcoba dilizeyesa, prilara ezepafa gu cinyona dofa guyaca va mempera co joackar. Cwe astirbaca al dilized. Batcoba tire tir ageltafa,

voxen vamoion grupeté, kiren Marthe va prilara milon gu jin turolar. Voxen me sonké nume va sugdalasa ewa fogemané. Va rena pu mesiakrikyá al fogedakté. Vulkú da Grangier W^{-ye} isu W^{-ya} va kota jinafa kalira pu nazbeya delvejon al rogilded ; voxen jin, kas nekev sinafa tigira pu ine co rokalí ?

— Marthe va jin me tuvazar, ~ pu int tolkalí. ~ Acum ant inaf gadikeem is jinafe gadikye weyonad da van inafa berga blaganyá aze kutcá.

Suyon ice jin, ar yik va batyon funesik wauner. Trakur :

— Bexe ant do ine me tigí ! Kire mantode dere me co rovekutcá, nume va meka skalera co gí.

Batkane vazik sovurser.

Va impadimak koe Sucy golda fu dimrundanyav. Oye bartivackupu ke kera, koe zazdazekos debanyav. Va cpara ke Grangier W^{-ya} golevgá. Sin va jin pluked. Pu nazbeya kimbad da ware tí oldik yovatas va ekul arti tanda. Marthe va kuvimeda djumulir ; dere vaon jafá. Arinton, ulison va kuvimeda co zo griporayar. Gadye mekon gildar. Gilisker da va afenka pu int zanolú. Skotcé kase gu jinafa ralidura co zo krandé. Ine askir, soe ulkeson inde Marthe me diepiler da va kuvimeda ulí kire milinde djumaskí.

Artlapiyison va F-, va Grangier yasa divkiavav. Pu Marthe abdiplekú da ba diref alubeaviel va dotay dem « *Le Mot* » fela is « *Tanoy Cadim koe Kusto* » bureté.

— Ware vergumvelt co puves pu aguntanye !

Ine kiper.

— Benje, Marthe ! ~ gadikya woltsoason kalir, lemistenon gan mana dika levgara.

Jinafe gadikye isu berikyeem al argawed, xabe ! Kaluca sotir jintrakafa.

Direvielon, koe olda, me satolé da va jinaf afizcek ke taneaviel pu René gopwadé, beka va kotcoba gikalí. Voxe me djutczá da zo balgé kire va Marthe birgon me al kutcá. Arcoba va jin evodar : re krupté da René me tir amidafe loon dam arak ke palikeem.

Pestaleson va rena mu Marthe, pune mu René is gadikeem is berikyeem leote dadí.

Pu int kuranison abdiplekú da abdi viel ke cinafa kakevetca va ine me wití. Wori, ba siel ke bareaviel, volkeson, va skaleracka va intafa axuca trasí nume vani sielestura va tela neva is fela di buré. Marthe va wazdera va jinafa rena ton bata braldera fu wir, ~ unt kalí, ~ isen ede va mana rabatera co vewar, pune co rodestegé.

Bak bartivamu, dum oviskik kal inafa mona vulté. Bam, kivason da bak estura fu mazuké, bak sanoya wexa kabdue polku paelpepeson ké. Pokoleyé da sionera ke takra batedje co di vukiyir. Ae volson vanlaumayar. Riwe djuprogotcé, voxen mali konaka wexa male vegungaf dilk ayikya va jin riliton levdisuker, djugrupesa da gelbeson keve bat tuvel va coba askí. Va jin gorar. Mamlé. Va mona kolaní. Pu kwik erú kase Weltikya deneon tigrir. Fure, Grangier W^{ya} ko olkobama awir

liz su zo kostá.

Vagrablé, dumede kwik co gogildayar da al Weltikya guceson al erú voxe ae va Weltocikya djuwí. Tukeraweson, djiá da Grangier W^{ya} va jinafa mazukera ba man bartiv skaler, dumede taneaf bartiv mielon co tir. Kire ba alubeaviel me rolanítí, pune va neva is fela pu inafa nazbeikya kle re buré.

— Anye, ~ Grangier W^{ya} kalir, ~ kiren Marthe va rin me co rovedgober. Inaf aguntanik va udorcek al seotar, ba aksatacku abdi inafa trakura. Arinton al artlapir, isen Marthe dene diref ikagadikeem resielon estutur.

Acum mallaní, aze larde tce mea rovowití, pune va Marthe lasumetrakú, voxe nopeon dun trakú.

Wori, lanrielon arti tanoy aksat, grableson div omaze koe Bastille golda, va ine titlanise va are omaze wí. Ine va yona coba ko dolexe ta intafa kurera fu narar. Erú da va jin kal Henri-IV di dositar.

— Ae, ~ kalir, ~ diretandon edje va toleekafa pula nobatal, pune jinafe ikagadikye titir rinaf tavesik va tawavopa.

Natcunon da va vayara mbi pulví, dumede mekara prilara co tir ke jinafa klaa, eefton dulzé da batcoba co titir nickapafa.

Ine woltsoar. Va inafa gadikya trakú.

Va Henri-IV artlaniv, aze me djubuluson vani batyona fobakasa ewa, gorá da va pulaxo arti tanoy bartiv kaiki tavera va zovdara di kolaní. Tí kalaf da battode Marthe va int me guutcorar ise mekon culimer ise dace gu mana wetara

nugrewar, i gu wetara entisa vodiskafa. Tí muntaf da ikaon me drager da ta doltura di godositá, ise va intaf ugal kozilir milinde va intaf zilí.

Koe Luxembourg gerd re tigiv ; larde bartiv koe bartivela ke Pulodaxe mamlar. Va olda levebgá. Koe ucom va jontika erba galovon dadí, i va erba loote dam kon oldik toldon gibeder kiren dene grevelita tigisa kadime Guignol ke Champs-Élysées va jinaf dotay dem riapafe piutegre arinton al dolé.

Bak prilara Marthe givar da den ikagadikeem fu miafizestur, voxen buivé da do jin di zavzagir. Lerde bartiv do acku mamlar. Marthe vagrabler, me giltise da kontel mu dal int va pula jovler. Voxe, wison da moe azilrova zavzagí, me lasukimbar da moe starka ke Henri-IV re co godebanyé.

Wan mezekav. Kaluca ape tir mana ! Vakol va jumta divgrablur aze va int botcer. Marthe ranyar, dum kontan botces va klokara moi moderama is ton gexata ware kenibesa. Altouson mumar. Batcoba va sintafa gildura larbudajar.

— Bata rova tid olgarsafa, ~ kalir, dumede djuparar kire ranyer.

Va gem kum gemafo leso diskir, i va gem felayen gan debanyera. Va zovdaks rubian gan derma kev alma vol lagestá.

— Djay, larde ko olda me djulanil, pune ko dolta dosital !!
~ Marthe kalir, taneatomon aflason va jinafa iskedara mu int.

Va ine ko konaka gritadolta dositá, tatceson da ine va xa puvesa va int vols jin jafar ; tulon, taruteson va raltaduka mazukesa va jin nek intafa gelukafa uka.

Kaiki batyona mocenera, gojupá da Marthe den ikagadikeem me di miafizestur. Me trakú da puveguckuson va zavzagira do jin puon rototuxar, nume va koncoba aneyá, i va koncoba jupasa da va jin ta binkabemura fu radimelanir. Va amerikafa zazda djukugruper. Pu aguntanik va mana lapira al vol roveberur. Ostik bantan va zazda somenobar. Va yonta gí. Beka ine awuzanon vewar, wan trakú da tere fu finer. Remi bartivacku, buiveteson va kotcoba al yazgá voxe ten karaké nume den ikagadikeem djukudositá, ton swavasok ke xonukalanzanik pokoles kali bocafa vula da kon xag moe kelda van rejdera lizukonatar. Va vannisa vawa wí voxen mecoba sokir. Voxen laizon, tazeson va ralpa, Marthe va stasik ke diremork kabdue piutexe vukisir.

Kalir :

— Va jin kemel !! Pu ikagadikya fu sumepulví, kalison da koe revava tigí, slikeke iluon num zdarianson.

Arti konaka wexa, gitakeson, va imwadolesik boyoté aze va raltada tantanon nará aze va tsenke volmiv epú. Va puvegura ke Marthe abicote trakú, voxe loote guzeká da resielon ware gorotuxatar viele pu gadikeem va xanta ke raltada gonodiveter. Cinafa djumera va nobara va zovdas cultim, bak taneafa kakevera ; rotuxara ke sumepulvira resielon tolkalitina pu gadikeem, i rotuxara valey tela icde raltada, bata kotcoba tiyid mu jin tarja pibafa loon dam kutcara. Kiren jontikviele mepuveguson kutcayason va konaka sardikya is vulkuyuson da va sina me renayá, pune va kutceem ke Marthe djumansá. Solve mana dofuguca tir megrupena gan jin, batvieli.

Marthe va piutexe divlanir, ayewase, radimi tela taneafa rotuxara. Va mane ke zazda keve Daunou vawila pu stasik golé.

Bro darsaf nobasik, va batakafa femla ke zanivasik vendegar, is va inafa kuca ta botcera va dilgavaf xwey, ik va atedaf ok ezlaf yolt ke ulida. Va kerafa raltada dile senger ise abdiplekur da va lavatrutca icdeon lingeter, i va trutca zilitina pu jin ta namira va bat vielcek. Erú da va afigasuteks va aguntanik nedir. Krupté da in tir listaf. Ixam pestaleson da va jinaf trakuray tuzolonar, tí murkapaf kalison da in tir listapaf, vox vilkiranson numen ine di trakur da dolon kalickí. Batcoba tce va skaltera ko gloza ke Marthe num ostik jekura va inafa muntuca gomimar.

Voxen bak kielcek, va danda ke inafa koyara gonundev. Aguntanik dem grupena griva gu ine ta kiblara va sintaf gutoeem va int al jovler. Voxen inafa gadikya en djudositayar. Marthe, tere, abdiplekuson va ralidura, al seotar da ant rolapir. Revielon va konako guto ta sinafa mawa gokiblar. Beka pu int al abdiplekú da va meke puve ok mepuve nope kona ewa ke Marthe di nedí, soe moe bedom wan lasulaní, soe aulon kore jinafa gandira mea tir ton armor mil dam tel ke lanira.

Bata vebana dositara va Marthe to goxe cwe tir. Kiren kle gopomá enide va mawa ta int is artan di kiblar ! Voxen va mergil witá, i va mergil ta kiblara va mawa mu Marthe is jin.

Va aguntanik kalion vulkupú eke arti lanisu bartivamu, kontan va jin co evodar ede co kalir da artan koe bata mawa kenibeter.

Aguntanik va Louis-XV martig gikarolar.

Grivaja ke Marthe tir ara ; va niponaf martig lodamon abduaľbackar. Kle va bat is ban golyumá. Vefara tir : toktel ke cin lokalion fu tegir ? Ba beta ewa ke Marthe, diepilesen va coba zoesa va ine, va volaca govedasugdá, beka dile me zo puvegá, enide va inafa rinta nuxaadá, kotviele va kono guto mu aro leon funeso va inaf iteem jovlé.

Ine prejar : « In va raltadukafa mawa galpeyer. » Va intafa griva dace mea rovwelidar, nume pu aguntanik vaon yofter. Diepilé da arti abic viel, belcon vaon balgetev.

Wori va bata axaca gildansá. « Ede ine va jin me renar, ~ trakú, ~ tokdume pu jin xaadar ? tokdume va intyona abduaľbara wetar, is va telyona ke bat yik ika telyona ke jin ? » Va meka lazava trasí. Tela beta soe co tir da co zolté da Marthe va jin co renar. Neken va voluca lané.

Marthe kalir :

— Icle, va raltadukaf lay pu in isket !!»

— Co isket !!

Bata antafa ewa va jin fu cener. Voxen, « iskera va raltadukaf lay », batcoba co milvodar da va kotcoba jovlé. Pu Marthe kaatoé maneke bata raltadukafa rebava va opelafo guto « cinon kiblano » co emoyad, nume dimefison kevu bilita, pirdá da ine va mawa kum kalka volmiv linger.

To baliaca tir. Afizcekon, Marthe al zo kugdapar eke meexuson zo vanolar. Nemon kalir : « Ae, ovel. »

Teni bat kuncas afizcek, va askiyina bora wauné. Va bata

renakurera (renamakurera) gu ovarenara al gutogutoon lajupartazuká, i gu mana ! larde ova va runda vol kereler kiren battan va gunteem ke renakurera dene bantan anton sotrasir.

Resielon buluson, lodame Marthe batvielu va jinyona pirdara taruter, pune djiar da bak yon diref viel ta kiblara va aryono guto pomatá. Abdiplekú, voxe va vogara kredá, i va vogara da pu aguntanik vol kalitir larde antafa lazavanya artion rojupasa va dostera va batyono guto, ede bantan va Marthe en renar, to trakura tir da kotcoba gan ine zo nekir, is gan inafe puvecke vanpitise sinafe.

Viele dimdenlaní, pune ko disukera ke gadye fobelí da ine gu jinafa yatera ixam al zo givar. Tire ae va mecoba gruper ; tokkane co rogrupeyer ?

« Baix ! Jacques va bata mawa giltavecketer, » Marthe al kalir. Ba komodera pu int wan trakú da, ede abdi kenibera va kurera under, pune resielon en goguzekar arinde darevielon al askir. Luxe jin, betinde bata rezatcara co titir, gu inaf Jacques abdiston al zo jaxadá : va vidiamielcek koe bata soyutafa mawa trakú, koe « jinafa » mawa !

Direrielon koe vawila va piutebildesik cwe bures va twa icde gracera pitcá. Va ina mbi bulká, koucomá edje va arak ko twak ke cinafu polku mimá. Bata diotetca tir opelackafa nume vaon gifavé.

Gracera va olda sedme jin sugdalar da tí renas va Marthe. Roklé. Marthe anton tir yonta ta bata binkabema. Wetce kowazdera, grivuteyeson do Marthe va mempera ke nuyuca, to ant re djugrivuté aze tuponkatá. Nuyuca kalion fu vanpir mala.

Bemugal tir poki tena, voxen mayeson wí da jinafa vunguca me di zo pursar beka di zo djudivoldá, da va kona piza tenukesa va bata rekola djumé.

Tre blira dem milyona rieta is wira va antaca, ede kontan lujon vaon djumer, pune metan va gomilara ke inyona galpera sokatcalar. Efe va gadye me puidá ; wori va tela coba loeke ropuidasa djutrasí. Pula kotviele al tid rejdera tove jin ; Marthe is nuyuca parmon al tumerogindenad. Sonkecké da ede va René leon karolá, batcoba opelon tir to kiren ine va koncoba ke reila pu jin kimbar. Mejé isen bata kivara va jin dace altokon akolesir viele trakú da koe trawuca ke milbemikeem diretandon gire tigití.

Xakon gu René, va intafa fogra kiewarson doon al walzilí. Acum viele ine deksafe leon dam jin dakter da va Henri-IV di zo divoldar, pune dere zo fodivoldá. Va gadye gogivá kiren ine karolatar da miv al kalití, abdi twa ke oldagadesik, i abdi twa gorestarsafa num melevdubietena.

To balemeaviel tir. Direvielon, i udorvielon, ké da gadye koe Paris tigrir abdida va gadya walzé. Siak va skaltena balemka dene exoma loon dam warzot tubemuar. Azen ken Marne mallaní, lize Marthe al kalir da rotir kakeveter. Me tigrir. Bexe. Ae kakeveson, jinafa rena va faja co lirder nume va gadye azon co di lyumá ; solve nope xefto vinustayaso moi vlardaf is gabentaf vielcek, joomason dum fudjeson fu dimdenlaní. Den cin dimlaní grupeson viele lewe gadye gitigrir. Kle « gruper ». Koe matela gozá, keson da gadye va jin volmiv rozar. Berya amliton vefad. Va koncoba diepiled. Tane berye, lulane gan xeftoara, kalir da ko mawa di golaní lize gadye senyer.

Vinustara ke puda ik dratcera co jupad da co kevié. Coba tir lorotafa. Gadye amlitar ; azon mevudeson, ton dace puda lozijnafa dam gubeon, kalir :

— Kle va tokcoba re xialal ?

Ikuza va jinaf iteem dum blatglemi me rodinvir nume koe taka felkur. Lent inafa kuranira, va tela jinafa nek merotaskisa co rokevú. Voxe kev mana zijnuca gonoxá.

— Va coba dirgatal da gonaskí.

— Volgue, me ware rotuxadal !! Kotviele al iské enide tegil inde djumel. Wan askil !! Ape djukuraskitil enide di iregleté.

Bak tena ke jotugal, dum ayikya djufolit da ikuza gu kotcoba grikidar. Gadye va ikuza dace me erur. Nope inafa vonuca, tí kinokaf gu gelkeugal is stekeugal. Kire pestalé da kalison va betcoba fu rotuxadá. « Icle bata rotuxadara va ine tolpozilir !!, ~ trakú, ~ vieli va warzafa puidera nekí. » Oke kre volgue, pu int wan djurotuxadá. To va kobara djupaskí, i va kobara cuesisa lion dam gozara is milinde iskesa va nuyuca pu swava num dure lotisa va Marthe. Steté da djulingé voxé al me rovekalí. Ware gadye me mekalir, ant ede dene cin wan raveté dumedé koe olda co raveté, vox dem nuyuca ta lingera.

Viele gluya men tid delafa, pune tanafa gracera va kakevetca staper nume korik di zo drasur. Loon va Marthe trakú, pune leleon vaon trakú. Jinafa swava tegir milinde iteem icde ros ke rebava ke mawa sotegir. Loon wir, pune tere mea wir.

Man volfoliks ! Va kobara dace toz karolá. Me al rotuxadá, voldum kivara.

Viele koncoba divufisa vebar da va Marthe levungon gotrakú, pune reniskon askí, ton kexuca satolena gu coba co rotiyisa. « Baix !~ unt kalí, ~ mancoba co tiyir listarsafa. Va ilava is moeon kenibera belcon me rokiplá. »

Koncoba va gadye evodar. Twa ke oldagadesik me artnir. Ine va jin taneatomon nyaler, folison da va twa al solimpá aze va fastafa warzotara al stetá nume batkane va dalintafa driuca al belundá. Ae bata twa me krulder. Al folí da zo divoldayá voxé al roklé. Batdume ba tena ke tilderugal gadye va mecoba al gildar viele va twa ke oldapofesik al kazawav.

Bantel eruyur kase akoleyé, nume va jin tori diretanda di gobendeyer.

Tí daavaf kire va gadye tere rorwavé ise va pestakaf mekak ke jinafa tigira rotadonemé kire va Marthe mea forená neke wetce antaf renanik bagaliaf gu jin torigí. Trabe wan rená.

Ton bata renadebala tí viele arti tanoy aksat kaiki kazawara va twa kocenkasa va kurera, moni acku ke santaneaksat, va ganexa ke Marthe dimdenlanison trasí, i va twa dem bata toza : « Va rinafa amlitara vol gildá. Tokdume witison va jin me lanil ? Ape al vulkul da va jinaf gutoeem al kiblal ?... »

Marthe koe J- re soker ; inafa vawila vane titon Marne kuksa tigr. Kot twern va san-toloya garia iclo dazanir. Destá da tela inafa tir maneke gijafa. Ae, Marthe koe vegem anton irubar, kiren pilkotikeem is guazafa exoma va titak walzilison kopoled.

Viele ta kielestura artlaní, miel ixam dur. Ant dilk ledam ayaf tisik va tey razdar. Wison va bat dilk koafin gan memiltafa

teyka dum runta, va firdtoza folí. Azilaf tuvel ke matela tir fenkumuyun. Va mana frayera destá. Va mamlesiki aneyá ; me trasí. Tere, vanticlaniyison va avlakeem ke rapsay, va ralpa ke ronef sidot djukutazé, lizu puda zo gilded. Guazikya va tuvel fenkur : erú lize Lacombe W^{ya} soker (Lacombe tir reyolt ke Marthe): « Ticeon ». Va fogelom koe orika ticlaní, ardeotason is tanileweson is kivarson da xaka co sokiyir. Tazé. To Marthe fenkur. Ben inafa berga riwe ipé, milinde grupedansas korik divvawayas va bopelawera volins gilaskid. Ine vol co gildar. Ape krupter da nuvonagé, kiren abdi kotcoba erú dume « tey tir ».

— Kiren keson va rin, va tey kum krubinta koe keldega ke bontay al askí, aze keve afiga beliyí.

Kolanison va mawama wetce bontay dem abico guto is dem storn is tcalistap pibaf dum sulemim, i va mawa tuvwepana num nutisa bor, belcon tí kalaf isu vol, inde wenyapizusik wis va intafa drunta va rola gaverson kosmar.

Marthe kene keldega gin senyer, kalizison va reliez kan nornokay, is kalobrason da koni ebeltafi ki gu guboy me belcekar.

— Va dakela ke kruba rotir me albal ? To ikagdikeem va eksa ke intaf pilkot ke Vageexo mu jin volmiv al vanburer.

Marthe va pinta ke int nuparar, koe bata mawa tisa ke jinafa skura. Rotir bata ra va kotak vilar volsen ine gildajar.

Volson. Bat tey va jin felber, isen zo wivé wison da dum jin kotviele ine pester batkrilon teyedase, pune bankrilon rwoder.

Inafa vumeltafa is gorestafa gexata koe bata govitafi afi sedme jin nutir listafa loon dam betviele. Koplewenseson ko bata olkoba, bati afi va varafo po vider. Kotvielu illaní, pune miel dur numen va kono guto volins klantá.

Marthe me grutir rovafe. Koe daava, wan tir gorestafe.

Jinafa swava pokeon abicabicon tuglagawer, krupté da ine tir amidafe. Re lané da vaon mea rená, acum en toz rená. Pestalé da vol ropatavá ike vol roturbé, va betcoba batvielu is ware nuve rofiandena gan rena vol rotaskí. Vere pesté lokiewaf. Bata levgafa betawera va vofara ke bet artan co jupar : me sonké da tí renas va Marthe. Volson, mbi wazdé da jinafa rena mea tir numen nucanya fu ikaplekur. Bat renas siakap jupar da levgon dosté da kotara pestaka co tir gomilafa kire va kontan renas va ine co moxar, i va kontan godikis vox me rowis.

Wori, arcoba gu jinaf ageltucaf pestakeem co gocenkar. Weti konak aksat, kotviele va Marthe kakeveyé, jinafa drowigafa rena vol tatceyer da va ine malyedayá, da krupteyé da inafa locoba listafa vol tiyid mana, i locoba rumeafa. Re, ede dum ine me trakú, pune arse kiové. Kaiki duskuca ke jinyona jugemera, to gan pibuca ke lopofa pestaka zo coé. Pestalé da va betcoba abdiplekuyuna mea di rotaskí. Va Marthe toz tarká kire toz rená.

Kotsielon laní ; dace me djudjiá da ine va mawa di nedir, ike ware leon me djumerú inde Jacques va cinyono guto al krafiar. Va bata kotabafa aguntara anton jugemé, va alto uzeso senyeso poke keldega, ise me rovezeká, kivason da beta zatcara ke jin va kaluca co aloyackar.

Voxen Marthe va mila mempera grivuter neke ant fogrivuter. Va brunuca ko jinafa vunguca belir. Trakur da gan jin me zo renar, nume gestir da gu bat amlitaf bontay fure di zo argá ede va mecoba tikisa va jin co askir.

Stivawev. Va wazdera va kaluca guon maltrakú.

Poke Marthe kiewepé, laneson da va milcoba miledje trakuv, eke pulvira fotir solovafa, damo unt pulvira viele ant tit. Bata amlitara va bata kimtya anzar. To utcoruca co tir ede va goleba yoromafa lion dam ewa ok zatca co favé, miledje daboreson da mekara lorukuzafa co krulder.

Kotvielón ko bata kiewotafa stivara loloon tutitsuyawé, numen Marthe gestir da loloon argawé. Pester da djuprogaskirsir enide va jin di deaser.

Ton stokewes usuk, poke tey djukakeniber. Oken folí da keniber. Va moda yontar enide va meem anam jinafa berga plekur, aze divmodeson ton abdaf iteem pu jin kalir da gabenton su klokar. Me djupwader. Va inafa rolafa kenibera impavantá nume va inaf usuk isu berga isu anteyawes tcoreem pezidá, lowe vwalason medivmodatason; voldum jontiktan folid, kotmana santara me tid talam ke rena vols tel loriaf talap sovidun gan ske. Jin, cwe, jinafa nuca konover. Wori toz piksepé kiren ant rena va roka tove ayikya sogetcar. Va rena co fiandé, ~ trakú, ~ vox metode kona dikira va Marthe. Ison, seotatason, dace djuprorená, kore daboré. Va Marthe jugemé voxe me narú.

Kotviele batinde keniber, ton taka altogisa va tana jinafa ma, blaganyá witison va inafa vola koanamana gu tey. Batcoba tir

vefara va tey. Lanviele vanlanirsí neke jinafa vola va tela inafa me uzar, nume tí dum veel lowe kaiknis va poun seg num koimpan gan zat. Kas batcoba tir rola ke zat ok veel ? Kle va jinaf kutceem kev tel inaf almá. Wan itabuder, vox cwe dum kontan mekenibes. Kutcá, akoydan gan jinafa pirtuca solve ae to ine va jinafa taka kev art al vanimpar viele gu inafa vola al vanplekú ; inaf kutceem bak bopelara loyatkon me co kotcagir. Voxen me narú kase zo djugiwar oke doon gowizuwé.

Re, debanyer, va jinafa taka moe badeem gir, santason va jinaf usuk is pudomason tolkalison : « Gomallanil, meviele batliz gin lanitil !! » Me roverinú ; viele mea rodestivawé, pune va ewa aneyapá, veveduson va blayak inde merontion pulví, kire beka me roverinú, kore pestalé loeke dace vol ronowinú. Ikuza va jin anteyar. Kotviele belaxa mo nuba ke Marthe luber, pune zinulá da ine di ier. Va int koridá kire va mempera al joá, trakuson da plekuson va kutceem kev tel inaf, ae al tí oviskaf, vulkuson da to ine al askir. « Gomallanil, meviele batliz gin lanitil !! » Jinafa riyomesa ikuza isu puidesa va sint aotcewed. Batinde yatkuca ke dapnarin idatcol lion dam ikse rotur. Ede pulví, pune va Marthe di lutsagá. Jinafa amlitara tubemuar ; ine va trobindara koeon wir. « Larde gemelt tir gaverses, ~ jupá da ine trakur, ~ tison memalyaf nek rotir afalaf, areldon albacká da in di mejer. » Koe bat tey, tcoté, yoyermitá. Gu jinafa puidera divfisa va sardugal, rumeafa pestaka va int loplekud. Tí tcokesik me djumallanis kiren disukexa me puver. Kalí : « Me mallanítí. Va jin al nulel. Va rin mea djuwí. »

Kiren va gadikeem me djudidndenlaní, voxe dere va Marthe me djutolwití. Lodamon va ine denu ine co aloyá !

Voxen ine boregar : « Til rumeik. Ae me narul da djiá da vay di mallanil, to kire va rin rená. »

Bogeson, kalí da gildapá da va goni gickir isen kurenik koe geja tigr.

Ine takazekar : « Abdi rin, tiyí kalaf, va aguntanik forenayá. Ixeyé da in va jin doplekunsuyur. To rin pu jin al nedil da ae va in me renayá. Jinafi goni me tir teli rinon trakuni. Volto rotuxadara pu kurenik, vox to merotuxadara pu rin. Mallanil ise me folil da tí ikoraf !! Fure va jin al vulkutul. Voxen va volkaluca ke rinafa blira me djunekí. Boré kire tí guazarsaf mu rin !»

Bata renewa tir lugodafa rumeaca. Isen damo beta jinafa darefa skeura, va mana rosontena kontega ke sanlerdikya boresa kir rulesa guazarsafa ste meviele gin witi.

Kiewotuca ke bata taneafa kutcara va jin al awuzar, bro ilt taneon yoyan. Volto koe warzuca vols gubeuca va puvepe sotrasit. Kadimion osk va art ke Marthe giltickí, voxosk mea rofiandé. Voxen ine pulvir da va jin kotvieli co rozelar.

Resielon, Marthe va jin kal mona dimstar. Tigitison loon pokeon, lev seila ayaté, ise va ine bene fonta gí. Mea kalir da va sint mea tolwivitiv ; volson, tir gabentafe trakuson da va sint fure buluv. Vebar da va kunoya oviskaca ixú.

Kabdue gadaxe, vol djuprogiské va dimlanira ke Marthe ant, nume kal inafa oga dositá. Ape bata rumeaca me fu tenuwed kiren va jin gin djudositar. Nalé, ant ede arte zaloracku va jin fu isker.

Arti gavesu bartivacku tori sielestura artlaní. To taneafa toma tir. Va impadimak gu bata gavera koridá. Gadye nujifolir.

Mea koncoba va jin anzar. Koe vawila bagon re laní, lion dam koe klokara.

Va kotcoba jinon gojeyena remi rumeugal re gosugawalká. Ison jinafa muntuca va firviyini vefasiki blokayar. Mana targuca nope vefasiki miv va int zilisi co tir ! Tí grijaf gu ske. Va Marthe dikí ; volto jin va batcoba al kalí, to ine. Va inafa vola rotuzá, va iteem ik ma rokutcá, va ine robducté, robloká, inde djumé. Bak yokagera, bugdadá lize inafa alma tir lebafa enide inafa gadikya di uculer da ine va fertik dikir. Va jinaf tozeltayeem co djutcalá. Jinafa rumeafa govituca va guazafa sugdala ke ralfeks katrasir. Marthe kalir : « En, va jin bugdal, tcalal !! Co djumé da kottan di gruper... »

Va inaf moueem co djukutcá. Me roveberú, trakuson da ine miv bundatar, bro kutceem. Arti abic viel, re gidikison va inaf kutceem, va konara sutkaca mea guzeká.

Afigon ice tey belcon gibeliv. Va twa vieleon stakseyena gan kurenik mal redjel konakviele komimar. Oye sinafa bemuaca, diepilé da twa ke Marthe leleon tukrenugawed ise loloon turiawed. Akolukemeson va batyona twa teyesa wí. Sina va tey remi gemelt tugijad, isen areldon kiva da loon afton co wí.

Marthe re jontikviele erur kase ae mali cinafa taneafa kakevera al rená, culimer da abdi intafa kurera me al kalí. Battode me co kureyer, ~ espur ;~ kire ede va teca rena mu Jacques tozi aguntarugal al satoler, bat abrotcirsaf golde geja va rena ke inafa takra abicabicon al sular. Va Jacques ba kurera

ixam mea renayar. Pokoler da bat sanalubkaf udorcek dozilin pu Jacques va inafa pestaka rotir di artazukar.

In vanyer medeksaf. Kontan renas va tel merenas sozuner. Neken Jacques loloon dun renar. Inafa twa tid ke mejesik, i ke wiiskik ontinarson rundas va dilintafe Marthe num merofolis va kona levcoera. Acum va ant int koridar, anton voseson da di mbi pebur inde va ine al rorotur : « Krupté da tí duskapaf kapbure rin, pestalé da kota jinafa ewa va rin bakar. » Marthe anton dulzer da in rokler, da va mecoba culimer.

Bam toza ke bareaksat tir. Imwugal tir abditcaf. Remi kot viel viele Marthe va jin ko Paris me dositar, pune lebafé kake ezbanda, ker vieli mal ravera va zovdara di dimlapí, senyese kabdue keldega lize krubinta ke ikagadikeem wan teyedar. Ine al erur da in va eksa toltadler. Me grupé da va teca vazuca lente koncoba meviele askiyina satolet nume zo kagí. Va Daphnis trakú. Batlize to Chloé va konaka tavera al kazawar numen Daphnis me roveberur da di mbi taver. Ae, kas me krupté da Marthe kre tir ketik zurteyen bak taneafu aksatacku ke kurerugal pu megrupenik az konakviele konariyin kan po ?

Kotsielon, antaf koe ilava, va Marthe dun rozá, va int sateson, jin fogetis ayikye, tí dikeke va ine gu fertya lajupaskí. Kotvielon, lanison den ine, abduplekú da me divlanití abdida al askití.

Ba jinaf santevdaf ilanukviel, bak bareaksat ke 1918, beka ine voser da me di mibuegá, pune va ezbanda bundar, i va ezbanda milafa gu tela intafa, ise djumer da dene dalint diskítí. Daavon, riwe seredjú, jin someaskis. Jinaf yontagem ! Kiren

cwe batvieli to kivara va kipeuca va jinafa jugemera al riojar, i to diskira va vage viele ine vol diskir. Taneon gorá da va bat gem ba resiel fu diskí. Azon tuckerawé, gildason da yal tir dem culimera.

Runi cinafa renara, Marthe va tselka ke kraba al zilir enide koe matela me goketé, ede xuye koe widava co tigitir. Va bata tselka levolgunon rozanié. To pereaviel tir. Va Marthe bulú, abdiplekuson da ta miafizestura doon eldeon lanití. Voxe kuraní da va ine runi siel woratá.

Ba sielestura, pu gadikeem dakté da va gozarapa do René koe Sénart aalxo eldeon fu boká. Batenide ba alube bartiv sielon mallanítí. Larde varafa mona wan kenibeter, pune metel va bartiv ke jinafa mallanira ik kasafa mekenibera di rodiepileter.

Va bat azed pu gadya biwe su divrozá numen ina va kita kotrafa gu eksa tori kelda miv djumegar. Zo yondá, bata kita va kote berpote is lugode ke jinafa tegira vilar. Jin abdigrivutes va mayera ke Marthe viele va mawa kolanití, va inyona mkipera re trakú viele ine va bat mempese sersye dem kita ta baera bene ma wítir. Kore pu gadya kalí da René va int gu kotcoba al paasler, pune ina vol terektar. Loa acagira, to divmodara va uculera co tir.

To coba tuvolkalasa va kontan, va artan co tukalar. Edje gadya va kita tukotrar, i va kita blokatasa va taneaf renas mielcek, pune va gojepes iteem ke berikeem wí. Va deara va kita trakuckú, voxen moida sin koton al estatud, kore co zo ustata, ae puvegutuson va lanzara va jin, va kotcoba djupwadeted.

Gotrobindá larde cwe mek vask nutir enmusaf.

Levvogá da kaiki miamiel mallanití viele laneté da gadikeem al komodeter. Lasubelí. Voxen ba mamlara ke sane bartiv bene dotaxe gadikeem ixam koe ilava tigrir numen mea roké. Koe taneaf vegem irubar, jin koe sidot. Enide va rebava loeke melorason fu urpé, pune va twindeem me kodiskí. Gison kan bata nuba is gison kan bana va bata kita rantafa oye tirac, va kwikaf tuvelam obrason fenkú. Muva dur. Kiewaxe ! Muva va lor fu besar. Kozwison da afi wan tir runkafi koe mawa ke gadikeem, riwe dimon djuproseyá. Voxe mo kelda ixam laní. Ison xelkara va twindeem re tir volrotisa ; golde muvara gonokotiskí. Azon, va rebava gonurpé kire va polkubiota gometuwidlá. Va rebava vanlaní, liz tudrikatason va yatera, moi sielestura va matelaro va kevon al rundá. Bata rebava tir dem mikiya moe verol. Muvara askir da sina tid kildesa. Viele rumkanyá, tana luber. Jinafa polera va lor ke akeoyera jonsanar. Ko vawila re gograblé. Va kita kan talgeem gí ; ko warula lubé. Bak tanoya wexapa wan ranyé, itamadason van dilk ke gadikeem, witison kase bettol co zekar kire va koncoba al sonker. Dilk wan tir vlardef. Tí vawelaf !

Lanitison den Marthe, va Marne kuksa kenelaní. Terná da va kita ko kona amna fu palsé aze eldeon dimnarití. Geja va mani tegi tuwupesir. Ae tire, ant lize amna tigid isen lize va kita co ropalsé, pune sayakik va J- za anamsur. Jontikedje klabú, zwaf loon dam kontan daykas va fobaki. Nekon va jinafa voltaxa lajumastú.

Polku ke Marthe tir budeyenu. Va marna sokiskena koe twak narí. Va matelama vultedason remlaní aze va rapsay ticlaní. Va

twindeem tiolté aze va fogelom ticlaní.

Marthe gitir noglotapafe ! Witison va jin kolanis va mawa rotir fu krezer. Skotcé ; va trek ke ludot me trasí. Tere va marna vion tacé, divmodatason va metan. Koe sarandaxo va kevumuvak apté. Kivá da va mamlesiki gu vulesiki fu doję. Va mawa uzeustason kallaní. Vukí, gire djumotceson. Rotir Marthe va jin someixeter. Oken ede vere co fu kosmá da va jin levcoer ise do ayikye tigrir !

Fenkú. Prejá :

— Marthe ?

Dulzer :

— Lodame, va jin maneke vudesil, pune anton eldeon ba riel co rotartlanil. Va udor abdi anyustka kle seotal ?

Va jin gu Jacques dojer !

Neken, wison inde va in co emuder, milviele zo givá da va koncoba ixam palser. Jacques arti anyustka nuve artlanitir !

Runafí. Ine lente rebava wan senyer. Kalira co tir favlafa :
« To jin », voxen wori, me kalí. Kev berga kutcá.

— Rinafa vola tir pumapayana. Va int bosolal !!

Bam rwoder aze malier.

Va tila vere betar, aze me lasugildason va jinafa mielafa tigira :

— Voxen abegye, fu akolel ! Va int kalion basvigel !!

Ampur ise va tey koe bontay dimblir. Viele ko mawa dimlanir voxen me zeká, pune kalir :

— Kas djumel da pomá ?

Jin loeke kivas va gemelt ke basvagera is guzekas va kipee ke batcoba, va muva kumzilí, i va muva getcasa va gadikyafa sugdala pu bata basvagera. Voxen Marthe ko burmotaxo dun lanir aze dimlanir, witison kase lava ke *grog* uliba tir idulafa. Tere, va jin lewe lebaf moe ilava is palsewemes lev krinca trasir. Buzegar : « Gulebara tir oviskaca ! » Va jin gu *Köln* plawa pragadar. Azon, Marthe va gemak fenkur aze va mielaboz pu jin kevmimar. « In cwe tir vas rinafo ontinalto ». Tan aboz ke Jacques ! Numen va rotickisa artlanira ke bat sayakik trakú, larde Marthe al folir.

Koe ilava tigí. Marthe kazokever. Erú da di artafir. Kiren, dace koe inaf meem, va jinafa vazuca rodaxá. Mielak va jin fu tutakrelar. Marthe zijnon dulzer :

— Me. Va rin komodes djuwí.

Ba bata kanyafa ewa, zo funé. Va kontesa zijnuca wí, i va zijnuca ke battelya koton arpumasa vanpitison va fertik vox merodiepilesa va jinafa akolesafa vazuca num dostesa va jinafa komodera pokeon. Mali balemoy aksat, dun kalí da va ine rená voxe meinde kowazdé voldum gitisa getcuca ke ayikye nek jontikviele ikasa va rena. Poason artafí. Gire tí do darefa skaltera viele den Marthe fu kolaniyí. Voxen dum kera kabdue tuvel, tela kabdue rena titir trelafa. Ostik, jinafa gesta va yona

dreldaca pu int abdiplekur maneke vol lajupenvar. Dere taneatomon kiva da va kurenik vektá nume va setikeraja ke cinyon renas gemelt pu Marthe fu nafé. Kle ine su tir kalafe loon dam jin. Voxen dye viele va sint kevulicav, pune inaf iteem va jinafa akolukera vodackar. Inafa gexata al remvolawer. Dace destá da va robuda aname inafa vola dum koe alkafa trutca me rotuzá.

Gu mana kivara re tí kiazayan, voxen ara artfid.

To tere gildason va gjarotiuca ke zatca men ebleyena golde vazuva, skotcé da Marthe va kurenik co pasur loeke espur.

Larde va coba taneatomon grivutena vol rogildá, pune va pojara va renara kotvielón loeke grupeté.

Keson, rolafe puve va enkravera ke ayikye pu jin vanburer : i va lickuca.

Va Marthe saté kire nope inafa muntafa gexata va sotisa kotcoba ke cotgluyeem gildá. Va bantan rotapsá, i va bantan divmodayan va inafó alto abdi jin. Va intafa fituluca krafíá, krupteyeson va Marthe gu ketik. Arugale, djumera va awalkera ke infa kurenik co tir rumeafa korcaca, voxen bata fuxa tugomilawer lewe mileke ede co aytá. Gu jinafa koblisa kaluca va geja danú ; va ontinuk guon ké. Pokolé da ina va jinafa bogera fu zanir milinde kon ayoltik ika min gomilar.

Re, belcon borev ; to golde kaluca. Marthe culimer da va dalintafa kurera me al weyoná. « Voxen artode, kas koe bata ilava intón narayana co tigí ? Dene gadikeem co irubar ; va sint me co rowiv. Va Jacques meviele co pasuyur, voxe me co tir ke

jin. Voldo in, is merodoluneson, rotir wan co batcer, pokoleson va lokiewe. Va Jacques me bogé. Va lanera va kotafa danura pu bat ayik cinon coen bogé. Voxen va Marthe renarsá nume me rokrupté da cinafa kaluca tir gomilafa. »

Belcon borev kire anton tiv rumeik dadis va abiccoba. Ilwalera va Marthe ! Larde ine tir ke metan, anton ke jin, mancoba co tir guldera bas jin, larde co zo solparsav. Ixam, va tena ke geja guzekav, i va tena titisa tela ke cinafa renara. Grupev, kore Marthe vogapar da va kotcoba jovleter, da va jin radimelanitir, pune me tí exusaf nume va int plekuson ika runda ke Marthe, va mana oviskafa mojoara me djuproguzeká. Marthe diver dume ruler guazarsafe. Arti sanalubda, jinafa blira biwe tozuwer, ayikya va jin renatad, i ayikya tisa ke inafa refa klaa. « Co gomejé, ~ ine loplekur. ~ Ede va jin fu jovlé, pune nopeon xonuketé. Ede fu zavzagil, pune to golde axuca askitil, numen wison va rin wetas va rinafa kaluca mejeté. »

Nekev jinafa exukera, va int saté da va vole nuruyensé. Voxen Marthe anton ker da fu zo buiver, numen beta jinafa lazavaja sedme ine nutir umafa. Ine dulzer : « Gue, va batcoba me al trakú. Pestalé da me rotuxadal. » Jin, nope kivara ke Marthe, pestalé da intafa odiakuca tir leon delafa. Acum jinafa vinura tid tulwafa. Anton golde doluca nudimcoé. Kalí : « Volgue, volgue, til oviskaf. » Kaxe ! Tí gustarsaf gu jotuca nume gonoguzeká da gu Marthe va int iliksantutú lanviele inafa jotuca omweter voxen tela jinafa rumbeter.

Beka jinafa rena va parmaf tazuk nuzomer, tire tir tec remgudaks. Kev bet lirk tuaxawer.

Kle, oviskaca ke cinyona gloga remi bat mielcek va cin al cuesid loon dam telyona ke cot. Bata va cin gu banyona al nutilded ; ae tire al tenuked. Wil, loote, dankad. Mielcekon al dankad. Va bata ezlafa rotuxara sonké : wil ba ticawaltara sodankar. Batcoba me tir zultaca. Jinafa klaa va mekenibera afanar. Voxen Marthe dere katcalar, akoyepenon eke ape bata toma me tir taneafa. Va jinafo po licaso va ine kev jin me ronarur, kiren inafa akoyenuca kowazder da ine va bata kaf mielcek do Jacques men al tiskir.

Viele ejadé, pune va cinafa rena gu burkaca krupté. Fotiv taneik pestales va lanyona skaltera, me grupeson da rena sotir dum ezlopa, isen kot fertik, don bet rotakapaf, fogetuwarzar. Pu Marthe kalí (voxon mefolison), jupason da ine trakur da va dalintafa bemuaca paká : « Va jin iskedatal, are ayikye va rin puveded », va int nurulaner. Jin, voxon, loloon toz lané da zavzagiti, dace viele titir leon jotafe, kiren jinafa vunguca ten askitir da cinafa kotabafa kaluca gu inafa fa rupteter.

Keniba va cin ton lebuca akoyer. Ba divmodera, wison da ine tir nisayane, kiva da fenter. Va inafa alto uzadá. Ino tir teyeso. Wira va inafa kenibera va jin cugeke tudreldar. Arti sanoya wexa, bata drelduca nutir tabina. Va Marthe kev epita kutca. Ine me divmoder. Toleafa kutcara, leon rome yafa, ton tizuca ke surk tegir. Ine vagrabler, aze, itapragason, va jin gu kutcara besar, dum va kontel renan az katrasin koe ilava arti klokara va inafa awalkera. Ine, volson, va ageltaca al foklokar, nume ba divmodera va jin katrasir.

San-tane bartiv ixam tir. Va sabaxa uliv viele va mamlesiki gildev. Va Jacques vere trakú : « Warivode in va ervo gir. »

Beka awalkera va jin cugeke kovudar, pune me skotcé. Volson, co nalé da to Jacques co tir, ant ede va cin co fu aytar. Kotara tenekara cwe co tir kipeafa.

Guzekara va awalk ton auluca tir zolonafa ant ede kontan ant guzekar. Awalkera ke volant toloy korik sometir awalk, dace sedme mefolisik. Nigesira tir volto bulura va blira, vox to bulura va tupestara. Viele lana rena sotir blira, toka amidaca wal belcafa blira isu awalkera tir ?

Me rovofolí da tí gradilik, kiren trakuson da Jacques va ant Marthe oku jin rotir co fu aytar, va jinafa ketsuca sabé. Kas dace grupé da tela ke bata toloya piza tir loon rotafa ?

Larde Marthe me zekar, cwe al roklé isen mamlera tiyir to dene pilkotikeem. Voxen mamesiki gin tauler.

— Amlital, me zekal !! ~ ine prejar. ~ To gadikya ape tir. Al vulkuckú da moi mista goworar.

Tí kalaf kir vrutadas va tana inafa wetara. Kotviele, vielu fertik ok nik tid gavemes ta kakevetca, pune sogestí da su awalked. Gason va bata polinda pu inafa gadikya, va inafa kivara froná isen da gan jinafa derka zo satoler.

Va budenu polku ke matela gildev, kadimi dokalira (tire, Grangier W^{ya} pu korik ke sidot al erur kase bak rielcek kontan va dalintafa nazbeikya co wiyir). Marthe kaku telvung divdisuker aze kalir : « To ina tiyir. » Va rilitucaja me rotacagí nume, wison Grangier W^{ya} dimmallanisa dem mistablikerak koe nuba is dwisa va merogildana gracera ke nazbeya, puvegú. Ina van budeyen telvungeem gin rwoder.

Re, va betcoba mea gojugemé nume pesté tumemalyawes. Va int vanolá da Marthe pu gadikya mewegayeson roderotuxadar, isen jinafa volfonkuca va mancoba pu ine culimer. Wori rena, sotisa ketsuca ke toloy korik, va kotcoba gu int sowetar ise va rotuxadara soblidar. Platin gan mil degrik, ware culimer da va artlanira ke kurenik al palser. Batvieli va intafa evayuca al sekiá, me djukugazason va Marthe. Jinafa olguca va aulaca aykar. Bré :

— Fure va jin ilkadetel. Tí dum kurenik, lion fikaf.

— In me tir fikaf, ~ ine kalir.

Ware dakí :

— Battode, va cin toloy coel, kalil da va in renal, til valeaf : arti anyustka, do in rovocoetel.

Kutcbugdar, borer :

— Va tokcoba lieke tuikorasa va rin al askí ? Vosé, va minaf taneaf vielcek ke kaluca me blokál, vay !!

Manteca vordava va askisik sobakad. Va koncoba ke intafa kalira vol trakú, neke vol lakalí. Pu Marthe vol rodivé da jinafa rena laumar. Ape va niaafa klaa zomer, numen bata zugafa nugera tir almotcera ke rena vanpisa ske. Mejé. Vosé da Marthe va jinyona dilfura di vulkur.

Pilkotikaf kwik va twa levo tuvel al fargier. Marthe narir. Toloya ke Jacques tigid. Wetce dulzara va jinafa iltrakura : « Raplekul inde djumel !! ~ ine kalir. » Tí kinokaf. Erú da di belir voxe mu int videter. Marthe, sundeson num lureskapason,

va tana anamplekuxa sollipar. Twa tir volfakafa gu sollipara kir ape abrotcifa. Inafa zatca vanpir warzafa culimesa katectara. Va bata lureskara ilkadé, is va inafa titisa sidjera. Soe sugá nume, kuranison da ine va toleafa twa me di sollipar, unt sú da sedme bata nakila Marthe en tir ikorafe. Erumbon gan jin, belir. Sundaja va sollipara va taneafa twa al jupar, voxen volto sunda askir da ine kalir moida va toleafa su gixur : « Kelt gabler kiren va twa me al sollipat. Jacques dakter da kot udor koe inaf gabot su zo obukar, numen in abdi tanoy aksat me denlapitir. »

Ant rena va mana grivaderka roskaler.

Bat kurenik va jin toz funer, loeke co gokalobrav. Beta twa ke in bro utsala laizon tuzolonawer. Gaveon miafizestuv. Moni alube bartiv, ken kuksa gozav. Marthe zo akoydar viele va kita divwerdá, winon gan susik. Rupa va kita va ine deaseper. Va inafe vertove mea kivá. Laniv, mesonkeson va xariuca ke cinafa linulara, ton alto va sint kruso. Gelteem va sint kevlicad. Bat taneaf awaltas taneaviel va yon gozasik dem bapledji al atrisir, milinde muvara va nyul. Korik grupes va Marthe vol rovekiavad ; voxen mesonkeson va koncoba, ine merovon kiavar. Gu fuglara ape toregid. Koerur ise djugruper kane div mona al yaté. Kiper azen inafa vola tuorikawer ; bam va jin grewar, popon licason va jinaf gelteem, kiren jontikote al wupé. Daykatasan va kita, va ine dimdenlaniv. Ae mu bata kita, va tena bagaliafa gu batyona stuva ton staksera pu ervolia witá. Voxen mana tena co lemisteper dume unt sú.

Marthe djumer da va Marne kal La Varenne di kenolaniv. Lente Rena Ewala sielestutuv. Abdiplekú da va *Écu de France* tcilaxe nedití, i va taneafa tcila wiyina bak jinaf rumeugal is

baalpeyesa. Va batcoba dum dulapeksap pulví. Voxen viele rabatev da bata tcila tir liona, pune me djudosté da bateke al roklé. Va iwota ke Fulbert ! va kotcoba ! va betcoba al folí. Espú da va Marthe volgunon al kotcomé. Ine me gildar kiren me gikrandé. Ae, bata dempa va jin tukexar. Unt kalí : « Jin re folipis va rena ke Marthe, va kona tsabura rotir wití, dum *Écu de France* tcila !»

Kire va inafa rena jontikviele iltrakú. Konakviele nué kase me tí virt mu ine, i rinta vere rojovletena viele dili va ine gu goni kimbatar. Wori, ~ unt kalí, ~ art ik iteem ba lanyon gemelt somerotuxad. Efe. Voxen vieli tel levonaf ayik tir grijaf, pune somibuegar ede va dalintafa trula iku vobor me nalet. Koe bata debala, tir puraf lieke ton sokack tir. Gemelt edje me rorotuxat dye tir viele cugeke girotuxadat, moekote pu int. Folira va ayikya « viele ina me rorotuxar » tir to folira va rolafa disuca ke totcidik.

Jinafa afaluca anton tir loon iyelakiraf tazuk ke jinafa ixakuca. Rulé leon opelkaf, neke arinde tí, larde beta klaa va ixakuca somedivvawar. Afaluca ke guazugal me tir beta. Bata drowigafa afaluca va kotcoba tove jin tuorikar, askir da va Marthe iltrakú. Kre, va int iltrakú, dace krupteson da me tí bagaliaf gu ine. Kore va kunoya wazdera va inafa rena co dadí, pune dun co tí volkalaf.

Va jwa somemuxana pu tel renanik grupersé, i va jwa somemuxana golde kivara va rumeafa tira, nume va bata awuzasa werkuca dene Marthe cubé ise mejedá kire va inafa swava me kofí.

Ba larde bartiv is acku sielon dimdenlaní. Gadikeem icde gozara koerur. Va Sénart aalxo seramon pimtá, is va inyona rucka jontolon ontinafa dum jin. Va Brunoy dere pulví, i va mempesa wida lize al miafizestuv. Laizon, gadya nulesa va jin nonur :

— Icteon, René bak kielcek ba baleme bartiv batliz al lanir, nume al zo gevapar raveson da do rin miledje gozapayar.

Keron aundé. Bata stuva isu jontikara pu jin al raved da me grurotuxá neke amkemé. Kotviele zo dapnarí. Gadikeem va meka arcoba loplekur. Moron xultur.

Gadye, laninde, mejilon tir dofugik ke jinafa taneafa renara. Kre bristur, felbene da jinafa abditcuca laninde ok arinde tuacawer. Dun kivayar da ko nubeem ke ayikyaja co lubé. Tir valeaf grupeson da gan sintaikya zo rená. Anton astoleweter viele kosmatar da Marthe djusolkureter.

Gadya, ina, va cinafa skedegara lekuvon krafiar. Tir lickafa. Va Marthe kan iteem ke kevlík disuker. Krupter da Marthe tir volluntafe, mesonkeson da kota ayikya nope jinafa renara co sotir. Ostik loeke dam gadye va velark abdikereler. Destar da Marthe va int do pelfudik ke jinafa klaa rorotplekur. Ison, koe F- zo gaayar. Koe kotbata deorafa widava, vaxeda koe telyona dodelikafa, milafa skeura isu begardara sokernigud, liote dam koe winka. Voxen ison, vegunguca ke Paris va bet begard iku levaykara loeke tutestar. Kottan va intafa ema icdeon gogir. Acum, kire va fertikya dem sayakaf kurenik tikí, pune palik gransen gan dilintaf gadikeem abicabicon ilfid. Griawid ekekon : male taneon nazbeikye ke tegivsutesik, kale ironokon

tele ke matelik. Gadya gan batyoni tegi zo duxar, i gan tegi nutisi brudira sedme jin. Krafiar da gan oviskikya zo gruspé. Cwe culimer da gadye va ina al razdar ise vol vofadar. Voxen malyedason da to gadye gotegir neke stivawer, ina amlitar.

Va kot mielcek dene Marthe tiskí. Ba sane bartiv is acku gilartlaní, aze ba alube ok teve gazdon mallaní. Va rebava mea vamoograblú. Va tuvel kan jinafa tselka fenkuckú ; voxen bata nuyalaca va vetcoyerapa ikadiner. Enide biota me di divmodar, pune va urifey gu kilta sielon anamplekú. Dimdenlanison, diregazdon deswá.

Deneon, metel va beta jinafa gracera vantrakur ; coba koe J-vol tir mila. Ixam konakedje, pilkotik is guazafa exoma kan kre itaja va jin krafiad, lowe dulzeson pu jinyona kiavara.

Gazdon, ba alube bartiv, vugeke loratason, dem perfejuleem bene nuba titlaní. Titeon kodiskí. Langazdon, koe fogelom va vrodbildesik gamdá. Va bor dem vrod bene nuba gir ; jin va perfejuleem. Ton eaftafa kicegara gazdakiavar. Marthe di zo tazdar. In kotliz koe J- fu vaon galbur. Gan jinafa kipeuca loeke zo naké. Va amlitara ke vrodbildesik efe rolusté, voxé agié kire me grunarté.

Bak kielcek, pu Marthe vaon vol rovekalí. Ostik, bata zixa tir mefavlafa kiren Marthe ixam tir rotplekuyune. Batcoba to jontikedje tir. Nisu va ine wetce fertik pu jin abdi geltruca ixam al yofter. Mekon al vofav. Fure afton wiv. Acum lanviele va Marthe poiskafe trasí. Pilkotik su kalir da mali balemka va jinafa mallanira ba gazda pitcar. Taneon vol al djuprofolir, voxé re mea itrakur. Bata guazafa exoma dem mawa valeve tela ke

Marthe va lorara mielon is afizon askina temer. Marthe zo nolyer, djumallanir. Me gorav da icde kakevetca loeke di xeyuv. Pestev volrotaskis : soaks re tir sopuyun. Bam Marthe va konakcoba evodayasa toz gildar. Antafa enrenonana nikya, i jotaf sverigik, pu inyona twa mea dulzer. Al ravé da daalasik ke bat yik va cin dablus koe impadimak lanviele al kozwir nume al pirdar da ina va Marthe mea di wir.

Askí da Marthe abdiplekur da ede betlize ont dene gadikeem ont kev kurenik kona piza co dilizeter, pune ine acutur. Dratcera ke pilkotik is kotu nisu askid da va nura wal Marthe is Jacques kiva ise belcon pokolé.

Marthe vosé da bak udorcek ke Jacques konakviele woratá, i ke Jacques ixam pulviyimb va jin. Vewá kire kiva da yordajatá ise va Marthe do beneon kaiktegise ayikye witi. Udorcek co tir santankaf. In rotir vurseter nume va mergil ta loa tolka trasitir. Askí da Marthe vogadar da pu jin vieleon suteter. Va barka ké aze laneteson va trasira va twa, den daykarafe piutexe laní. Balemoya ixam tigid. Voxen me rononari : va tanoy adraf pilkomaf valdig grací. Tí voltrabiangaf kire va jinafa koblirafa maza al rotavé, larde favera va daykarafe piute mali sananyustdafa klaa anton zo sonover. Keve kuk karaké, djukabuson va culo ko iteem ke piuteikya is djukonarison va tweem inon gin nek mezilitin. Tere, larde koe piutexe zo grupecké, pune ledamon seotá da tweem den jinaf gadikeem direvielon zo stakseter.

Fotce, vanpition ayikye, va jontikcoba ware fu gonaskí. Fenkuson va taneafa twa ke Marthe, nué inde ine va batmana sega fu skur : i va sutera va renatwa. Al vulkú da mek twind tir

leon wavdaf : ant rena sotir adrafa. Krupté da kota twa ke Marthe tir mafelafa is bagaliafa gu telyona lolistafa twa ixam beliyina. Neken Marthe va unaykaca pu jin koeon kalir, is va rejdera ke blira sume jin.

Destá da jinafa lickuca me tir loeke bugdasa. Va Jacques wetce « kurenik » toz krafiá. Va inafa jotuca ilgrupé, va ine wetce guazik wí.

Pu Marthe me suté ; slika arpuma skre tid. Sopron tí kalackaf kire me gosuté, satoleson dum lente beta warzaca va klubafa kivara da me co rodefaskí isen jinafa twa va ine co lemisted ike co nutid opelkafa.

Jinafa frayera askir da arti tolka, iskedayason va tana twa ke Marthe moe azega, ina al griawir ; moe azega direvielon gin tigrir. Kosmara va bata twa va jinyon azed funer : va udorcek ke Jacques is jinyon tigris bartivap al impavantá enide va intikeem kobuivé da gu Marthe va int iliksantú. Kiren, beka taneon al sipoyú enide gadikeem raver da va fertik dikí, pune toz djumé da va lea wazdera dadir. Isen gadye va ageltucafa lazava ke jinafa proyuca to raver.

Va bati tci impavantá nume den zovdas cultim gin laní ; kiren, va lebaca vey Marthe malipon zovdá. Me grupé kase gadye diepiler ; icle va tankomuca ke jinyona tezikya rovon destar, kan bask tuckerawes va jin. Batdume den Grande-Chaumière gin laní, kobapá, katanatason va konak remgudaks tori ark ke retanda, i va eksa tuwarzatana ba direfa worara ke kurenik.

Dere va René gin wí, i René divdenayane gu Henri-IV olda.

Ine va Louis-le-Grand re nobar. Kotsielon banliz aneyá. Va sint palseon nobav, kiren mali inafa divoldara gu Henri-IV is mali moekote Marthe, inaf gadikeem gelkeon torigis va jin gu tulanya, va jinafa dositara al zuker.

René torigir da rena koe rena tir tervasa tuksa nume va jin gu ske mu Marthe krander. Tabison va inyon vord, nyukon kalí da va enrenanik ae me dikí. Inafa mafelara va jin gelkeon tuaxaweyesa vere laumar.

Moe rena ke Marthe toz komodé. To getinesira va jinaf pesteem tir cugeke olyastera va jin. Jinafa ziadgera tir to tela ke klawusik a klawa, ok ke vikizasik a ruseta.

René va jinafa takra nuler, neke va yikya al duxiber ise reniskon forenar. Bata kafa sulemya, i latkaf espanik, va int iltazukar eke ape tir ke riva. René nujidewarur neke tir lickapafe. Kipeson is belcon tuzwaweson voser enide gu abigaca di zaná. Bata zanara, sedme bettan grupes va olda, tir ordafa rieta ke oldik. Djugruper kase battanya fu ortar. Batdume vofatason va ina gonabdugá.

Bata zanara va jin funer. Jinafa vazuca dimon tir cugafa. Voxen ika mecoba co djunuvelá vazaf, azen bexe bata weltikya va jin al grifuner. Va jin wilupon al abdugar eke jinafa vazuca gitatcesa va lancoba vox givebasa va arcoba levweyonar da va René is Marthe tarká. Icle djupopovedé, voxe tí bro vikizasik giltis va tanoya sugduka. Kle anton sidjé da va René al ortá, beka al vogá da inafa fertya va kota abdugara dun beldar.

Tove Marthe, va meka sidjera satolé. Godefaskí. Kore unt kalí da vol ixeté ede co zo ortatá, pune vol lajupaskí. « Batcoba

tir amidafa », va int skalé, ton katcalafa entuca sodulzena gan ketsuca. Milinde, dostecké da pu Marthe me suté, voxen ede ine pu jin me co suter, pune co krafiá da me renar. Neken, bata mesagacama va jinafa rena al laumasir.

Jacques va mecoba ke tila ke kurenik vangruper. Marthe, gitise kanespafe, va in me vanpulvir. Ede in erur : « Tokcoba tijir ? », pune ine gidulzer : « Mecoba ».

Grangier W^{ya} va kintaf Jacques konakviele nyaler. Gu volobliuca tove nazbeya kagar, ireglir da va ina al dozilir. Va laizafa betawera ke anda ke nazbeya gu bata volobliuca gar. Va dimon ina den int djuvedgober. Jacques xaar. Arti konak viel kaiki inafa artlapira, va Marthe den inafa gadikya dositar. Bantelya va inafa beta rintara derber nume va inafa rena mu jin mesonkeson bristur. Marthe koe bato yasaxo al koblir. Pu Jacques kalir da kota muka va kalaf ugal kimbar, ugale tiyir ke int. Koe intafa sardafa mawa gokeniber. Jacques va inkera va ilava mu int icle djumer. Nogladeonesir. Marthe vewar da bata ketafa mawa di zo kifur.

Grangier W^{ye} torigir da bata werkaca tid solovafa. Grangier W^{ya} impavantar nume pu kurenik is arnazbeikye da va ayikyafa gedeluca vol gildad. Zo derber da gloga ke nazbeya va Jacques abicote pasur. Kiren kotcoba deswana bas kurenik gan Marthe, pune Grangier W^{ya} pu int gar, krupteson da inafa wegayera tid lugodafa. Mana ae tid, voxe mu jin.

Lanviele Marthe nuruyakoleper, pune djukudivlanir. Jacques grupecker da batcoba volto ta puvegura va dositara. Marthe va twa ta jinafe mane pu kontel me rotodiar, batdume ko kon

piuteak miv plekur.

Va intafa amlitara ware loeke wauné, kire ede co rosuté, pune gu pwadera va inyona raplekuna nakera, mu kosik co maltegí. Dile gan intafa rotura zo kovudá ; arviele unt kalí da Marthe va Jacques gu gomilara estenseter, i gu inafa griketara abdi jin. Voxen larde ske cugeke sotupestakar, pune sopron wivé da gomesuté numen Marthe va Jacques wan piksesir.

In metakrelaf dimmallapir.

Kottel va nyatesa antiuca ke blira ke Marthe gu bata deona koridar. Kiren inaf gadikeem isu kurenik ant tid megrupes va cinafa skedegara ; nope tarkara va tantazukot, pilkotik va Jacques me rovegivad. Grangier W^{ya} ixam wiver da va nazbeya katrasir isen ina dum abdi kurera fu blir. Acum Grangier gadikeem vol gildar viele Marthe, ba direviel moi mallapira ke Jacques, dakter da koe J- gire fu soker.

Bak mil viel va ine gin wí. Taneon tulwon buzegá kiren ine al tir ikorapafe. Voxen viele va taneafa twa ke Jacques belí, pune ve radeyé. In kalir da va xonukera co malnalenyer ede Marthe mea co renar.

Va itura me dimaotcé. Fogetí blodaf gu awalkera, vukuson da al galpé. Loeke tumerogildanawé ise tuvolmalyawé. Betliz rwodev, pune kon bakaks nediwer. Kore Marthe dun kalir da vode va pokolera ke Jacques mea derbev nume tiv leeke volayaf, pune to jin vebá da zijnon di dulzer. To jin va yona antafa krenugafa twa inon kazawatana pu inafa kurenya dukalí. Marthe astoleson suter, boreson, voxen dratcé da mevielu woratá ede me vegecker. Jinafa sidjera zo tuaxar kire

megrupeson Jacques va intyona antafa daava gu jin danur.

Oye pokolera div kota inafa twa dulzesa pu telyona cinafa, wí eke inafa djuksera tir enwelmafa.

Va intafa tila tove kimtaf Jacques mafelá, solve nope ketsuca tegí, is vol djupopatasan va gomil bene jiluca.

Kalafa rekola va piza radimifir. Kaxe, pestalera va abdaruca lapter. Tir vey jinafa klaa is jinafa etseriuca. Tí kuranaf ta mecoba, mei ta otcera il Marthe rotir ilgrupetese va jin num dimon kofitise va goni, mei ta platira va Jacques ko xonuka. Numen cinafa tanuca tir stopre dili, i stopre dimlapira ke ervolia. Ede in va kurenik co aloyatar, battode ine do jin co zavzagitir. Ede in co kevsutur, bantode pestalé da va ine poason vol co rodedimnarití. Cinafa kaluca tir bixeberma. Voxen batlize, larde krayta milbartivon sometir, pune pokolé da cugeke gaveon ticnitr.

Re, to Jacques mempen va Marthe gu inafa gadikya kevrojur, i gu gadikya mevaleafa gu gire sokera koe J-. Ison bati tegi do lana eeftuca va abica uculera dene Grangier W^{ya} al divmodar. Arcoba nutir tubizafa: Marthe va kwik vol djukudikir, biliton gu intafa yasa is ware loon tela ke argadikeem. Voxen va tokcoba gadikeem is argadikeem kev Jacques co rotaskid ? i kev Jacques vanpiyis vangluyanik tuke yona lazava jinon zilina kan Marthe.

To bam J- va ine toz viltar.

Pilkotikeem dikuon puon mea pulvir. Metel kiavar. Ant dafusik nope eba tid leon krumtaf. Acum, dile godedokalisson,

Marthe koe kona dolta vangaver. Viele dene ine tigí, ede ta lustera va vrod ik lupa gracer aze arti aluboya wexa dim mona men tigr, pune gestá da leve lundek senyer nume va vayniaxe ok zomxadolta kalvulté. Va ine banlize prilase do tilikya trasí. Ziadges kir nogladeoneyes, perlé batvielu diveon ve tigiv. Buntú da ine tir dem zugiafa griva, da va mempera koe prilara do dafusik trasir. Kot bantan gritrenayan gu pulvira va jin ilkader.

Aboyaf kitsend sotir opelackaf, dum kota oluaca. Voxen mecoba tir dem welima liote dam kitsend ke yavikeem. Inafa volpestorafa kaikporuca kare klaa taneon sorigavawer. Gidukara ke guazafa dacikya va kone jotafe sersikye cugeke co lemister. Va bogera ke zomxadolesik wis va palik waljoas va dalintafa yastaca do Marthe, iku vayniasik rodiepilet. Sin nope batyona prilara va ine kunon co skaled.

Pilkotik va tolsantoldafe nazbeikye dikir. Ine ta udorcek artlapir. Marthe ta yelada ganer.

Sielon, va pudavinustara gildev : ine va wira va lizukedusikya mbi pour. Larde gadye va kona jinafa tegira sometatcer, pune kalvegera ke bat ixakik va jin akoydapar.

Direvielon, edje va matela remlaniv, ine vurpar. Batcoba ape tir pursara. Ine argeckene takaskarar enide me di gokiavar.

Bata delivara va Marthe puidad ; ine gruckafe is umeke renase sonker da kaluca koe torigira ke vegungikeem sometigr, neke tir dum ezlopik grupes da ageltucafa ezlopa sotir « rotapsaks », nek nekevon dile mejes da va vligus vek me seotar.

Dotapirdotik va jinyona stuva dun yordad. Marin W^{ye}, irubase valeve kraba ke Marthe, i guazik dem lukoptaf lukast is olukafo ontinalto, tir savsaf dotapirdotik ke J-. Buluyuse abdi geja, va guga djukazanir, viele katecta pokeon djuprodir. Anton volvanovason va dotafa gaderopa, do kurenik blir ise kabdi warzafa ilana va grupenik anton giworar ike zo worar.

Mali konak viel, ferdara valeve cin dilizer, i pofa ferdara, ison male cinafa mawa beta lorara ke sidot zo sogilder. Blotdafusik artlanid. Kwikya, pomana gan tela ke pilkotik, koe matela va dilgavaxa erniger, ise va rifeks gu lutafa afita deswar. Gan vayniasik zo givav da kapa dene Marin zo egar, bulon yontanon. Marin W^{ya} va dotagadesik al ganer ise al voser enide in va vrod vas anyustoy inoc kaxaar. Kas va iara va vayna pu doltik dere fu korictar ?

Kaiki dozilira va novexa, ba vielack (lan teveaviel), mon san-aluboy strabik do intaf kurenik ba bartivack awid, i do kurenik kot tis redusik va kon seltom ta gadikyafa vanvrodara ik grelera va bakanik, wetce gadesik ik bewik. Pilkotikya ke bata mona, ta « tuurmara », kabdue tuvel emuder. Va bulafa jekura al impavantar nume va kapa gu baera al artazukar. Kota battanya va skapara tujded ise va fomeks al gandud. Acum, sinafa zijnaca tid regeltiskafa lupa ik berdavakirafa vaynaxa ikz-. Kota warzafa artlanisikya pu Marin W^{ya} kalir : « Ox ! Batcoba nutir fransafa, neke cwe titir kiewafa. »

Marin W^{ye} va bata kapa luxeon impavatar enide va « gaderopafa dimfira » egar.

Neken, to Marthe is jin tiv akoyera. Sodafa voltixolaca ke

tane pusye koe impadimak, i ke nazbeik ke tan bat strabik, va jin al givar. Va jinafa akoydara malyedal viele al ravé da deasera ke Marin titir da sin valeve cinafa mawa moni kieltena tigidid enide va cinyona santara onseted.

Ape va mancoba gikarolad nume va intafa puvegura djukanegatad. Efe ae, Marin weltikeem, i korobutik, va bata nuyukuca gu lidopaca dirbutur. Va intafa exukera do kot korikany ke dota djuwalzilitir.

Ganenik moe xo tigid. Marin W^{ya} gruper da dene Marthe tigi nume valeve inafa mawa va azega al tiendur. Bralder. Va runza ke atoesik co djugir enide va disukexa co rodakter. Golde voltixolaca ke jinafe pusye relmese ta coera va dilintafa yasa is nope gotuskuca ke klaa, amlitav. Va danda ke baera pu Marthe me al rovekalí. Va solponana gexata ke Marin W^{ya} trakú, is va iteem bene veel ke bartivela, is va bralda ke emudenikeem. Tere, kadimi pere bartiv, aborkafa tolonga bulud, ise va Marin yasik gu restesik pudomason askiped, is va kimtafe Marin W^{ye} gu bitonikaj. Bat diref pirdotik va ribiega is sega dun abdiplekur voxe dace abdi libura va beta tegira ixam al bulfer. Icede Marin W^{ya}, bana weltikya al tadled da kapa tir impavantas mergil ta muon seotara va eftol. Dotagadesik, ton korobutik, anton abicwexon al awir ; bata abica wexa is vrod vas anyustoy inoc va tintera al askid, da va nazbeikya ke Marin co skedegar, i va tavesik dene bema. Lekefa kurera ke Marin weltikyama gu opelaf dotardialik al bilitar kire al nutir bagaliansafa gu tavesikya.

Kadimion vepokupú ise jupá da sin va lana coba gilded, i va coba co djupogildeyena gan artel. Marthe gan bata laizafa

lujuca zo gevar. Mea roslá nume laxunigesison va mukot ke kapa pu ine razdá. Belcon kalkipegav.

Marin W^{ya} rotir co al tir driafa ede va dalintafa erava co al zaní, voxe va egale vol ixer. Re boger. Voxe me rovegardier kire konkane mea rotaskir ise va yoltiskafa twa me ebler.

Alubeaksat tir. Va Marthe dene ine leote gikakevé ise senyé anton kase va rotuxadara rogandú enide rielon di zavzagí. Tanon ok tolon safteon gandú. Gronafa tcedera va rotuxadara va jin evodar. Efe, gadye va jin me folir. Driarsafe vol wir, ant ede berikye is kwik me di raved. Batenide opelon kalí da ba alube bartiv gazdon mallanití, dum ba viel ke jinafa gozara ko Sénart aalxo. Voxen gadya va kita mu jin mea egar.

Gadye va kotcoba gitcizar, voxe moion va jinafa vunguca astoleson culimer. Bata nyalera basrodawed aze kalion tuvumeltawed, dum runta.

Rena cugeke sokodayar. Me tí vungaf, voxe vungú kire rená. Rena gojon pestaler da antafa enafa dantexa sotir kobara. Batdume va ina gu kevlik sokrupter. Voxe rena sotir kumaskisa vunguca, dum tunazbukasa muvama.

Ede jotuca tir trawafa, pune to kire me al tir vungafa. Nope otapa, minaf gaas bolc va rotukik sogukoed nume vol zo gruyed. Ke abdufis swavik, vunguca sometir. Isen remi batyon vielcekap nutis vlardaf sedme vrutasik loeke al ravé kire va jinafa bodorkafa takra dizvé milinde ba estura kaikgropik va intaf zatceem dizver.

Viele dene Marthe me kenibé, trabe lewe kotvielon, radimi

sielestura kali santane bartiv kene Marne gozav. Va witka ke gadye griiksantú. Marthe detcer ; jin senyes va taka mo inaf badeem windé. Va ine funé. Laizon vordavanon gan detc remsetiké da bata gozara fu tenuwer.

Rena va intafa tierduca djuwalzilir. Acum fentalackaf fertik tusantasawer, ben berga toz kutcar, va kunoya nugera gander, edje va twa sutev. Va Marthe maneke djukutca ant viele kona kobara va ine gu jin britsar ; va inaf usuk en djumuzá ike en djugriusukotá kotviele ine va int usukotar. Koe witka va ine ipé, besason gu kutcara enide ine va detc divgir numen witka toz dantaler, flintafa ke werd is batakafo abinko isu blafotafo. Ine va sugda ke somerowontesa skera kagruper, solve to pofe nizde ta mazukera va jin moekote platir. Azon, va witka kadime werdkipi ewalzev. Kivara da co tiv rowin ike co opsev va cinafa renarura kunon loeke tudreldar.

Batdume va plabuca ke pilkotikeem tuwavdasa va jinafa tigira dene Marthe me temé.

Jinafe drowigafe ne va digira va ine voldum Jacques meviele rodigiysis, is va kutcara va utaki ke inafa alma radimida ine al ixur da mekar kutceem almadayar, i ne anton tir nuyukuca. Kas pu int welidá ? Kota rena va intaf jotugal az milgugal az guazugal doburer. Kas moe bocafa eka tigí lize rena a lanyona aneyara va jin ixam me keldaskir. Kiren larde jinafa dreduca va giltira altogir, pune soe gan kunoya bifama zo tubliar, i gan batyona tuwadarama va gubeuca. Acum, me laumason va loloon awalkesisa urepta, vox ganduson va armor ont betason va bartiveem ont fatmason ortatason va viley, jivanik va int sowendesir.

Va bata taltefa domega ke Marne alpapá eke va bana amidapafa nobá enide va tela albana rovonyasé. Ronefa domega tir leon tulwafa, ziliyana pu matelamidusik ik tayamidusik, solve tela jinafa tir mu kliwik. Va witka gu aal givaniksantuv, aze iste dentxo senyav. Taya, leve sielupara, suster. Cinafa ketsuca, koe vask, va vetuig vulkur, wetason va dent gu erod ke rena, milinde gu Jacques askiv.

Kofiga ke abdaruca va jinaf pesteem lular. Va lofikafa daava loon vektasa va kona reniskon satolena do tela taneikya al grivuté, numen batcoba va warzafa zixa tukerovar.

Va romeyafa is nuyafa keniba karolá, is va kiewati ke antuca koe ilava dem fedaf dualt. Va proyafa lazava abduplekú enide va miel dene Marthe mea di tiskí. Ine va jinajo andapo mafelar. Va nugera ke lana pumkafa puda va divmodesa ayikya dere craké, i va tuwavafa buskusikya kotgazdon nudivfisa va kaikeda.

Va intyona malyopara isu stetara pu int culimé, beduson va nuera kase va Marthe loon dam abdion rená. Jinafa rena va kotcoba turotuvar. Milinde va blayak ke Marthe narujú, fozilison va titsuyapafa sugdala, pune va inyoni amlitki remtrakú. Kas dun kiové ? Lana gla meropimtana walzer da tagelton uzá. Jinafa pojara isu polera tid loon pofa. Keve ine senyé, isen dun djusenyé ant dene gadikeem, numen batcoba va rotabina dofa blira larbudar. Ison, va blira voldo Marthe me roguzeká. Va estera va foredonera toz grupé.

Va Marthe saté kiren abdi cinafa rena ine va gutoara ke mona ke Jacques kare jin al finer. Bato guto tuvitcawed, larde ta

volpuvera va Jacques vols intafa puvegura al nará. Va int meskaleson cuú. Batcé da va ant Marthe ta kiblara me al iské. Sino va jin ape taneon co volpuved, voxen mana mempera nope giltavera oye rena mu ine kaikion co tir ! Tí lickaf kiren belunda ke bata gubeaca tir mu Jacques.

Marthe kan ixakaf itemap va jin disuker viele piron kalí : « Pokolé da, viele belcon blitit, va bat gutoeem me videtet. » Va kotcoba jinon kalina sotarkar. Folison da bat gutoeem tid nope jin al vulkú, pu jin me rovekimbar. Va jinafi namiji unt arubar.

Bak taneafa safta ke teveaksat, Marthe va twa ke Jacques kazawar lize tere va intafa rena me dokalir. Akoler. Ko ropexe ke Bourges fu zo divbulur. Va inafa akolera me wivé, voxen inafa askira va kalira va jin kiazar. Larde in va J- direvielon ok veydirevielon fu remlapir, voser da Marthe moe goldetol va impadimak pitcatar. Marthe va bata twa pu jin nedir. Va dirgara ker.

Rena va levetirafa tuwava pu ine al zilir. Acum, lente mana kesa levetiruca, flecú da benplekú oke zuké. Sedme jin, jinafa amlitara sugdalar da finé. Kas rotatcé da ine va kurenik konakwexon co kozwitr ? Milinde amlitar. Numen, nope tec kraf doleray, va ine direvielon me denlaní.

Rielon veydirevielon, warzotik va lipi den jinaf gadikeem vanburer, i va lipi gobildeni anton pu jin. Ini tir male Marthe. Ine poke kuksa va jin ker. Voser da di kevlaní, ede wan zo renar.

Kal starka vulté lize Marthe va jin ker. Inafa kiavara, vadjensesa va martig ke lipi, va jin tuoprar. Folí da inafa takra

al betawer.

Opelon, Marthe va jinafa amlitara ke veydireviel gu plabaca al krafiar. Va bet kraf doleray me al guzekar. Famintera gu jinafa blisa tira tir moi yon poles bartiv, larde ant awalkera va jinafa pira arinton co tatceyer. Va intafa akoydara me rostetá. Va intafa fentaluca isu tarkara va inyoni goni mu akoles Jacques pebú. Va jin mialon folir. Zo zuner. Vol lajukalí : « Lanviele me rotuxadá... » Borev.

Voxen bata guyetsa tid teniskafa is puskesa kotviele kontrol me maer. Sopron, tila ke Marthe tove Jacques me tir derbesa. Va ine kutcá, kovdá. « Amlit, ~ kalí, ~ va cin me tceder. » Va sint abdiziliv da va meka birgafa trakura di palsev, ton jin temamas da ine va mancoba rotisa co folir.

Koo J-, Jacques va Marthe al itaneyar, aze ba pokonira ke impadimak va mona, va telvungeem fenkuyun al wir. Inafa twa voser enide in di zo grivudesir. Erur da ine ko Bourges di artlapir. « Vode mallapil », kalí inde bat blayakack me nutir culimera.

— Lapití, ede dositatal.

Batcoba tirsir jlokuca. Voxen inyona ewa isu lemistersesi tegi va rena muxad numen mal zidera kal volniauca betawé. Astolé. Va int tuvumeltá. Zijnon pulví, konten gan inafa ixakuca. Va ine gu rumeik erus va tael askipé. Kaatoer eke dositara ke jin co tir vollidaca. Larde jinafa dulzera me tir xeftofa, voldum tela ke kon situndan fertik, pune ramiruk laumar. Ine to taneatomon gildé da va « liduca » ewa tiyá. Bata ewa ribiegon artstir, kiren dum jin, ine va etrakasa deonera icde

liduca ke cinafa rena ape dile blidar neke tir ikoransafe. Arbe bata ewa, nope glasteducapa nekev exura va donaf glastedaf abdimalyekseem, co rofolir da jin tí vollidaf. Voxen volson, larde va ine taneatomon walzé, pune to wazdera tir kiren batvieli al torigí da va meka rotaca al askiv.

Marthe va batteca nistafa vidiakoyara batcer. Re gildar da mancoba tir volrotisa.

— Icle, ~ kalir, ~ novel da me lapití !!

Bata « liduca » ewa fokton tiyana va jin wetce inaf gadesik va jiluca tadler. Bro evayik tugrijaweyes nope warzafi roti, vaon yazgá. Gijarotiuca sonediwer ant viele volmalyon zo faver. Acum dulzé da va mek zvak gu inafa lapira ko Bourges torigí. Va kobuivesa danda trasí : cuesira ke koyara is borefa vogonuca ke Jacques. Bata danda va ine tuvogunad, tove icle aryasa ik rotir iteem ke Jacques. Tre vodjura va Marthe van woyok katis va jin, kare intafa ewava abicabicon asketcá. To va batcoba koridá, ise da va cinafa kaluca ins levvilá. Ine va jin vektar, isen batcoba tir jinafa sopura, batcoba va jin felber ise mibuesir. Va tana lazava ke cinafa gildura koon wí. Va nekira va stekefe egale dere soltrakú. Ae tire, va intafa melanuca pu ine abicabicon al deá, i va melanuca tatcetesa va kona kogorara ba gorukaf viel. Pestalé da dum jin inaf nubeem tir tulwaf isen ine pokoler da bira va bixelamone di umber edje ar rumeik ezeon govokolnad. Mana lidafa vektasuca va altoke dile benfir. Nope disukera ik lanira : konakviele diveik al trakud da tiv berik. Batcoba tir to kiren welk ke vektasuca vonen gan rena krulded. Zatca ik pudarapenira, va dace xeyapaf fertik waveon ok gaveon relmeted.

Godostet da takra va lazava megrupena gan ova sogir, neken ova leon becafa dam takra sotir. Ape sotir Narcisse albane va intafa ewava is ilkadese, i va ewava nutisa tela antafa mebrunafa. To bata aptara va vektara, va min remi blira star, iegason « vukil !! » lente patectoy ik ayikyá ik ezla. Mepestaleson va bata lemistera, va aryona ewava romafelat. Aptara va vektara sotir antafa stasa conya metisa tcafa. Voxen koe selt, ant duskaf swavik kev liduca numetrobar, linveson va mila inda. Acum lane ayikye va « latkikyá » ubzed, megrupeson da jontikviele vektarapa sotir enbirtafa.

Mali konak viel Marthe nutir ewarafe, megabenton. Ede co tir gabenton ewarafe, pune va inafa abdikerelera nope vanfira ke san-alube ke pereaksat co gildá, i ke evla viele va yasa ke Jacques bak vogonugal koe birawidava ke Manche gokevlapitir. Silukon, Marthe stivawer, vagrableson ba beta lorar ke jinafa puda. Va tabira tcizar : worara ke yasa ik bagera ik eeftafa levsgudalara ke gadikyá ik rubaca ke gadikye levaykase va tis fertik nek mefolise.

Tokdume va kotcoba tcizar ? Kas batcoba tir nope jinyona tavera culimesa va tuzolonararsa va coba ? Kas kiren gan betcoba zo givanolar ? Nutir kalafe, vox laninde kalafe nume va vustera pestaler isen bata kaluca tir volplinafa gu jin kir me wazilina. Viele Marthe koe jinafa stivawera va wazdera va brunuca kosmar, pune va batcoba gu rumeuca krupté nume silukon koridá da ine va jin mea renar kire stivawer.

Marthe vol rovegivar da nazber.

Co djunuvelá kalaf gu bat warzot. Voxe taneon zo akoydá.

Meviele al trakú da co tí blodaf gu betcoba, neke tí blodaf gu tele rote. Dere riyomé da tinsí ayikye nume krupté va coba gu volopelaca. Marthe va stege anton al pulvir. Skotcer kase bata govanplekusa vula va cin fu solparsar. Va saipuca zatcezapá eke inafa kivara tekawer. Ine va conyutapa ke glastedafa liduca vider, numen sedme ine bat nazbeik sugdalar da Lorik va cinafa rena gabler, da mek gomil pursar.

Solve Marthe va nazbera wetce lazavapa re krafiar enide me di bulú, pune zo yondá. Oye cinafa klaa, dikira va nazbeik sedme jin nutir volrotisa is volmalyafa kir riojasa va jotugal. Va inyona ugafa kivara taneatomon dosté : gan yasa fu zo jovlev.

Va bat nazbeik ixam rená neke nope rena ilakacú. Vewá da tití blodaf gu inafa pizafa blira. Maninde miv vol rodeblití.

Aptatca sotir nyapesik ; i nyapesik stas kal tazdara. Sure Marthe kivayar da nazbera va cin di ilplekuyur. Re, larde cugeke renar, pune folir da jinafa rena dum tela dalintafa laumar. Jin, sure, va bat nazbeik ilikacuyú, re toz rená nume va Marthe ilrená, milinde tozi cinafa skedegara jinafa takra va deswaks bas artel pu ine ziliyir.

Re, aykason va art kev jivot ke Marthe, volto va ine vols intaf nazbeik kutcá. Kaxe ! Marthe mea tir fertik vols gadik.

Batvielu mea tegí dumede co tiv antaf. Kotviele kon pabus vrutasik pokeon tigrir. Va bata laizafa betara ixejé, kire va ant Marthe gu blodik koridá, neke pestalé da dace leote co ixé ede ine al rotuxadar. Dile folí da Marthe rotuxadar enide va cinafa rena di dakimir, voxen nazbeik me co tir tel jinaf.

Bro akolik aneyas va vumelte, me grupé liz va int govodjú. Pestalé da va mile Marthe mea rená ise jinaf nazbeik titir kalaf ant ede fotitir vey Jacques. Efe, bata ortara va jin yondar. Va Marthe fu gonebgá. Voxen, kore va jin gu ayikye krupté, pune refa debala tir gorestarsafa numen gomefuglá ise gomefolí da mana oviskafa blira co tir rotisa (neke trakú : i mana utcorafa).

Kiren, tere, Jacques dimdenlapitir. Radimi bata cugunaykafa rekola, dum jontikar sayakik levcoeyen golde goaspileem, va gabentaf is algaf kurenik katrasitir, i va kurenik dem linularaja mekane razdana. Voxen bat nazbeik gan kurenik zo rodiveter ant ede ine va inafa ilagira bak tilderugal teizatar. Numen jinafa nyukuca va ine voser.

Ke jinaf nyalereem, bata me tir tela lodivulafa mei leportafa. Ison destapá da va abicote lyumara trasí. Fure mbi bebú. Marthe va cenera ke Jacques bak inaf daref udorcek vol rovewelidar, ise nujivegeson va jin ternar da, yontason va akolukera golde sok, koe Granville va in vol kempatar. Bata varafa trujara gu evla zo tuesar, i gu evla dotegalajatasa va radekara num restetesa va metel. « Xabe ! ~ unt kalí, ~ va ugal wan dadiv. Gadikeem ke Marthe va bilita craketer. Va ine ko tawaday iljupatar nume va warzot kagaveter.

Evla ke mallapira ke Jacques vanfir. Va bata gracera tire fu belundar. Batcoba titir yawara. Pokolé da gu Marthe va int frasketé. Ede me di lajupaskití, ede jinafa rena titir kusarsafa nume miv me iliksantutur, pune soe grupecké da va Marthe lisagafe katrasití.

Ine ba san-tole ke pereaksat, ba rielon pere bartiv fu

gomallapir. Koe J- daremielon zavzagí. Lanison, pu int abdiplekú da mielcekon me fu itabudé. Va santa fu eksapá eke va Marthe kotvieli mea olegatá.

Arti bartivacku ke senyera komodé.

Favon, tigira ke Marthe va jinafa kenibera giskalter. Taneatomon, keve ine, al kenibenyé milinde ant co tigiyyí.

Ba jinafa divmodera, ixam ranyer. Va jin me al rovedivmodar. Anton bartivacku abdi impadimak wan tir. Riyomé kire golde keniba va bocaf bartiveem ke cinafa belcara tiskira al drasú. Dere borer kire gomallapir. Neken va arcoba dam ulira va ikuzera co djuyazgá.

Marthe va intafa marna isker, eruson da denlanití ise va cin trakutú ise moe azega puon suteté.

Unt al vogá da va ine ko Paris me fu dositá. Voxe va jugemera va intaf kutceem vol rocené nume, larde nyukon leeke djurená, pune gu mallapira dirbú, i gu bata rolapafa « bocaфа toma », larde pestalecké da meka bocaфа toma co dilizer teka ine co kuranir.

Koe Montparnasse golda liz va argadikeem gokevlapir, va ine kutcapá. Va parara wan aneyá kire co djumé da aryasa ve gepoyter batkane gorukafa piza co dilizer.

Dimkolapiyison va F- is giblison anton ta kera va lanira den Marthe, lasuské. Va matela vurpá, labelí, do berikyeem palserú, mancoba mali alubka mea al sokir. Kotsielon, menekitison va ucul, gozá. Favon, kelda kal Marne nutir bagafa gu jin. Batsielon impú, ton ye mucuse va jinafa nuga num titosipese va

gandira. Senyes koe tiv, va awalkera taneatomon galpé. Voxe vol rodefawalké lidame vol rodeblí nume va sodus adjubesik zinulá. Batcé da nope arga ik puida someawalket. Jinafa taka abicabicon tuvlardawer, do lorara ke gartonga. Bocafa gelavara tir, taka re tir vlardafa. Komodé.

Fent ke vanafiz ke pereaksat va jin divmodar. Geribaf den cin dimlaní. Mona tir fenakupuyuna. Koe sarandaxo gadye va jin olgon emuder. Gadya al akolemer : kwik ta dimovdara va jin al zo stakser, enide va kurmik di kevlaniyí. Jinafa gracera kle al tir winugafa.

Va nyalera tcizá, mafelason va aptasafa gedelUCA ke malyesikany grunaras va tela antafa volgunafa tegira ke kunoya gobokena enide nover da gomilasik vengar. Ostik me vengá, batcoba tir wavdarsafa. Jupá da gadye folir da va J- mallaní, nume viele moion va trubara radimi sielestura zo poú, pune unt grewá da ine wan tir jinaf dofugik ise va parara levdafur enide ant mea rasoketé.

Kotvielón va piutebildesik ké. Batcoba tir jinafa blira. Va ine vol lasuvulkú.

Marthe va eluxawed al zilir, dineson da ta fenkura va dalintaf tweem faveté. Kas rofavé? Govodaskirsí. Va anamplekuxa sollipá. Kottomon, kinokaf abdiplekú da va twa bak bartivamu fu guspá. Batkane pokolé da va int fu lajuvanstujé ise va twa koe ucom fu lajugubudená. Kotviele va bata linulara gu direviel arevlá.

Lanviele, braldesin gan intafa axuca is riyomes, va mebeliyina twa sollipá. VielU eluxaki va matela vilunded, pune

upenyeson ipé. Twa tir dem afigasuteks va Marthe. Neken gibroyepé ise va beti tegi folvon ginarú, voxe va bata gexata al sollipá. Va walzera ke kelt wickí. Jinafa ejadera arti balemoy bartiv ke dimkrura va twa is delt anton tuvumeltawer. Maneke meveli al sugapá. Remi bata klicafa kobara selesa va iteem is nogleem, gan kivara va kona fepoaraja tove ine zo zobé.

Kurmik va birakolavara pu Marthe al juiker. Vaon mopoú neke va int gu ikoruca kagá, vewason da artan va inafó alto rowitir.

Ison, larde kottode Marthe va varaf aksat koe Granville fu tiskir, va tigira ke Jacques wivé. Va inaf batakaf afigasuteks nedyin gan Marthe ba viel ke gutoeem setiké. Mecoba dam yikye moe piluda va jin loeke vudesir. Abdiston, krupté da bete co titir listafe is glabafe loon dam jin.

Kurenik va ine kevon levnendar.

Ba lanyona krenugafa wexa, bro grijik dablus va kottan, pu Jacques fogesuté, welidason da tí fertik ke Marthe nume battode va ine pu in rovejuiké. Dile va Marthe sontene gan Jacques is jin djumá. Kas va tukalara va ine me co gosugav ? Bak batyona deona, pesté nyukaf fertik. Va Jacques co djugrupé, va coba co djupebú ise co djukalí dume gometiv lickaf gu sint. Azon, laizon, bogera va bata koliavama vanmadar.

Koe kota twa, Marthe erur da den ine di laní. Inafa karakera va tela ke tana abidapafa ziavikya kimbar, i va ziavik culimes pu jin da va naboxa ke veygadya meviele kevlaní. Va befoltusa wayeda me dikí. Bati argasi goni va awalk sorukomad, ik va rena.

Kas me koe awalkikxo va kon awalkik oku graces fertik rotrakut, ok me koe lana mawa ? Pu Marthe me lapebú nume pwadé da den ine fu lapí ; ise milinde pu ziavya da ko awalkikxo su laní ; vox lantode manon.

Lanviele, moe gort va bata sverigafa yikya volronowisa va Marthe kakevé. Jinafa tuantawera askir da va rumeaceem ke bat korik toz grivuté. Dragé da ina ko J- ta kielestura birgoton lapitir, direvielon. Va gracera ke Marthe palser enide me di kivar, ise dace loplekú eke ine titir kalafe gu tolwira. Me grupé da va coba fu djumaskí. Dum rumeik grupelayas num va sint lagevas, tegí. Va akoyera ik zidera ben pumkafa vola ke Svea di djuwití viele va gracera ke Marthe gogivatá.

Gue, to rumeafa puvegura va gevara ape tir, kiren va mecoba evodasa pu ina me laxukalí, solve va teca divepatectuca belundar nume ba kot blayak va jin akoyer. Mecoba lodam bata laizafa koekuca wal toloy gildujus korik tir loon sutkafa. Va moavafa gamdama dem faltafa miza bene berga diskir, i va ganda rumkawesa keve evakackaf gem, numen kare intafa griva tolgandú. To blisa bragoda arse tir. Pesté da jinafa djumera laumar, i djumera va tuwarzara va bata takataka arliz dam koe omaze.

Inafa tiva ke xidikya gan laniga ke ravesik ke Pigier Bema zo blokamar, i gan Pigier Bema lize ostik va Francava is geltsutera bak vieleon tanoy bartiv impavantanson vayar. Va intyona geltsuteyena danitca nedir. Kota twa tir dem tanoya rola, raston tuwadayana gan tavesik. Va rusetaxos dem zikexa vas biptafa sona gu aklaf eyeltos divplekur. Va ruseta pu jin firvir. Somevikizar voxe va bat xos dun diskir kiren inafa nikya

vikizad. Va sverigafa orpa pulvir isen nujigrupé : i va miel ke Saint-Jean is aejefta boteda. Azon va afigasuteks va jelya darevielon stakseyen mal Sveriga diveyeltosar : i va jelikya lebackafa okollakisa dem ontinafi edji ke veygadikye moe taka. Tukerukawé. Berikya vektarsar eke uculé da ina va jin kipegar ise va intafa ewava nedar. Kutcbudá enide va intafa djuvera va kutcara va bat facilaf ixakik tuvumeltá. Ape nutí bonolapaf kire wí da ina vuder ise va elogasiki kan ita aneyar.

Direvielon, den Marthe ba baleme bartiv artlanir. Kalí da Marthe koe Paris tigrir voxe fure godimlapir. Loplekú : « Al pour da iské da abdi inafa dimlapira ronomallanil. » Va suzenk anton kadimion welidatá.

Bexe, ina tir delfajapafa. Jinafa delfajuca va megubeaca luxeon narir. Nope tiorn ok opray dem konote mekon aelé voxe djutí tiorn vannitin gan inaf art oku opray. Kan tel jinaf volins konejé.

Volto nope fogra va Svea gojé, vox to nope delfajuca. Inaf tcoreem ledamu kutceem va jin stapeter.

Tiyason va kota asanka pulví enide ina gildackar. Gan bata deasesa esturama zo lulá voxe ware amlitason ziadgé kire kalianson grupulví. Godepulvidá, rumeon godefodioxú. Va oblaka gu inaf art vanplekú. Va inyona ewama ulí.

Vebá da ina va kuldea ulir. Azon, bro zveri tugrijamani vaon saá.

Pokolé da inafa grijuca va jinafa erava fu levzanir, kiren ina va kutceem eron ok voleron xabe fu firvir. Va volxariuca ke

bata nakila dene Marthe trakú, voxé, unt gire kalí, va mecoba gu cinafa rena deswá. Va Svea bro ilt jugemé, numen kon fertik va batcoba me rotir lickaf.

Va inafa nuba koe jinaf nubeem nutis glagaf gí. Va ina co djubasvagé, co djukovdá. Ina mo saxatca senyar. Debanyá, xowá liz inaf saxaf usuk runeon tigr. Inafa amlitara me bazer da jinyona kutcara puvegad ; voxen ina me rodefexuker nume va kona poraca ilikatcusa va jin meinde francavon trasir. Va inaf tcoreem bugdadá, zinulason da botafa cuizda di bimiler, dum kou glorde.

Tere va inaf art kutcá. Va jinyona santara levgar, ton keaf kosik, artbudeson is itabudeson. Inafa antafa vewasa zatca tir axafa kalizira va taka talturonon az ronutalton. Me kunipá, voxen jinaf art nope lana dulzera ve bidger. Poke Marthe meviele al tigí milinde poke Svea zavzagí. Bata metisa acagira va jinafa pirtura isu vunguca derber. Tí ixakapaf nume folí da coba kaikion fu tir milafa ise va delvejafa boera fu belundá.

Va ayikya mevieli al basvagé ; kre ganon al zo basvagé. Acum voloblion narté, tore deswason va perfejuleem is omexeem. Va inaf nugeem isu nimateem kutcá. Voxe viele va ulimey djubasgergá, pune bro oretlikam medjusenyas num poanon basvagen, Svea kuzur. Va jin dun nugar. Va inaf nugeem koe rid ebidú, dabluckú aze kutcá. Tere griaelera sokir milinde delfajuca arti slika vayna isu brekla ten tir. Azon va intafa fatmara fiste razdá isen da Marthe koyar. Vebá da ina abdiplekur da, ede va Marthe co kakeveter pune va cinafa lawara vol pwadeter. Pu ina me welidá da tí inaf fertik voxé torá. Puve ke bula askir da ina djam eldeon djamae dulzer viele

poron erú kase va sint konviele gin witiv.

Bak wana den Marthe mea laní. Ison konkase Svea va budeyen tuvel me al mamler. Pestalé da jinafa linulara gan gubefa liduca zo robokeper. Kiren ape to goaspil va Svea gu jin maneke al tutciamad. Kas koe mawa volke Marthe va ina co al jugemé ?

Voxe me sidjé. Ison volto trakuson va Marthe va jotafa sverigya iskedá voxé to kire va bota kotote guon al malnarí.

Arti konak viel va twa ke Marthe kazawá. Ina va lana twa ke pilkotik dogiskir, i va twa kalisa da mona vol tir kakevetcaxo, is bazesa inde va tselka ke kraba favé liz va ayikya al stá. Batcoba tir wazdera va rinafa zatkura, ~ Marthe loplekur. Ine va jin mevielu witiv. Cugkase mejeter, neke en djukumejer lodame ins zo ortar.

Grupecké da batyona dratcera tid vestafa isen kona rotuxadara ok dace ageltuca vanmecobatar. Voxe zo ksabé kiren koe bata joasa twa Marthe va ksera me pulvir. Va fentaluca gu ine kagá. Krupté da twa tir volbagaliafa gu divera. Kiren jin, ton milafa debala, kore va ksera me co trakú, pune gucetesón arse va Marthe guon co dratcé. Nope merorelvana conyuta ke klaa is olda : folickí da lana rotuxadara gan skefa beksa zo sodirgad.

Warzaf ol ke jinafa ravera va rena atoewer : tuvolgunara va jin tove Marthe, numen koridá da ine va jin leeke dam pilkotik dirnur. Pebú jontikeke bata tiura ke Marin yasaja tir deksafa. Ae, Svea va ine al worar lanviele deneon suteyé, numen al fenkú. Kozwiyison va bata yikya reme dilk is grupeson da ina ile Marthe zo suyur, me al djumé da va vidjera ke Marthe va

bata portafa divgira foliyir. Palseson is nekev jontike arge ina ape al worar.

Batkane pu Marthe rodakté da takra ke Svea muon wan tir. Ise tenuké, muxason va tolpozilira ke darefa pulvira va Marthe koe inafa mona do tel koekaf dositik.

Bata elogara askir da va rena gonomunestesa va minaf tegieem rotapsá, solve co djumé da pu int ok bettan vol munesté.

Soe fiste, ~ unt kalí, ~ rena va gundap ape firvir larde kot ayik va nuyuca ko inaf nubeem bulkar. Stekeon co djutí pockaf enide va rena rofiandeté nume va kona jugemera vol wetatá. Me grupé da wetce levetiruca ika levetiruca, tulevetirara ke takra vode tir kiewafa loon dam levetirura ke pesteem.

Milinde blat sovirusnar ise va blatak sotukular, pune renasik va intafa rena gu kota jugemera sokisa koe vawila tukular. Jupar da fertik belundar. Va ugda tusagasa va mesagik men al kosmá. Ede kone ayikye va ayikya gojer ise va bata fentaluca gu renanya kaburer, pune tela inafa loblifa kir merwavena jugemera di askir da bantel kotvielu cugeke sotir tel renanik. Zo ortar, voxen sedme selt liduca tir giwanafa. Nuyukuca to nope manyona patavarama sotozuwer. Acum va yone ayikye rotortase va fertik ba pelava ke rena kaliarson me lanzat !! Gu zivoluca me buntut !! Sine va mana beya sobalved ise va kaluca gu puve dace me djuprodojed.

Marthe ker da va int di nuspá. Voser da va inyona culimera ixé. Askí, voxe laninde. Pu pilkotik suter, beonon erudason da bak inafa gracera in godoster da va inaf tuvel mu tana nikya dile

fenkú.

Ba dimlapira ke Marthe, bak tena ke anyusteaksat, ine koe J-vols mona ke gadikeem ware tigus koe tildexo me soker. Bata warzafa zikexa va jin gu bawamala zanudar lize Marthe kotvielu blir. Bawacu is birgafa djumera va antiafa moda griawid. Va mek mielcek dene gadikeem tiskí. Teyé, ampú, dum korik jotaf gonawalker nume kunon kaltegir. Va Marthe abdi lamesa gadikyuca djumimpavantá.

Bata mawa ke sardikya tir cinafa mawa lize ine va tigira ke Jacques al vewar. Vamoe vwepafa ilava, albá da jinaf iteem va ine ton tinefkasikam kakever. Vebá da ine va ara ewava va int bak pintugal modisuker enide cinaf nazbeik vaon di vektar. Zo felbé nume koe bata mona mwarné lize ine al koblir ise al rumber. Koe griktexofa mawa va inafa djuzanudatana kova uzá ise va inyon klaim isu drufta volmiv divgemaká, i va senteja ke Grangier sare.

Va kraba ke J- me batcé lize gutoeem va mempera ke tel lodevakaf yasagutoeem me atoer. Va mecoba pu jin rotaver. Volson, batlize, kotbat olkoy va Marthe pulvir, i guto ape klantayano gu taka gan ine omafe. Ison, batlize bliv, antaf a dotapirdotik is pilkotik. Me vustev, dum govitik lebamon gozas koe matela bro enletafa ewala. Mo preima gisenyav, valeve ruxagalza ke vinyaska is kunesta is vora gikielestuv. Ton art keve art, gu yake tredune va sint kolyumav, i gu yake bakapane is zakodafe gu awalt. Gadye meviele al seotar da va matela viunsú, voldum yone berye, voxen va tela ke Marthe ropé. Olvezá, basratá. Ba siel ke idulaf afizcek, va intotcuca ke ayik satolé, i va tugrijapasa intotcuca grisiputesisa va tawa is vosesa

imwa, i va intotcuca milafa gu puvedesira va ayikya. Va vonuca gu trawuca gikrupteyé : va kotrafo po re gildá. Imwa rumbewesa nope jinafa ropera, wilya kenibesa leve izga radimi moplera va fay : mana vonuca ! Mana ketsuca ! Kona agafa imwa ik kona mazdafa wilya va cinafa ewala ke rena co tugabentad. Lava jinon plekuna isu fay va jin lodam imwa ik wilya gukoed.

Remi bata tuwarzara ke takra, va intyona noeltafa kosmara ilvulkú oke vligú. Va nuyukuca nekina gan tigira koe bata yasamona wetce tena ke nuyukuca krupté. Batdume, bata bocafa safta ke anyusteaksat is pereaksat fu tid jinafa antafa enkalafa rekola. Me vursé meie va int baká meie va Marthe baká. Va lirk mea wí. Santevdaf, va blirinda djumena ba lukrafa klaa guzeká. Koe tawaday co blitiv ; co zavzatav kotabon jotaf.

Senyes keve ine moe preima, is santason va inafa vola kan werdolk, pu Marthe vion is frendon pebú inde cinafa blira fu tir. Mali dimlapira, Marthe va kraba koe Paris mu cin aneyar. Inaf iteem pumawer viele dakté da koe tawaday djusoké :

— Va batcoba vol rovefirviyí, ~ kalir. ~ Foliyí da co argawel, ant do jin, da va widava olegá.

— Va jin grupejel, ~ dulzé.

Poke Mandres co djusoké, liz lanviele al gozav isen lize ralta zo midud. Banvielu, radimi sielestura koe Paris do Marthe, ba rundanyara va ironokaf impadimak, arviele xuye va batyona raltada al pezidá. Koe kusk ke golda, arplekusik va dataf medras yult gibasvajad. Remi rumeugal va bat bulaf impadimak dem raltada al anamgildé, i va impadimak remnis ba bartiv viele

rumeik kenibed.

Marthe kalir :

— Raltada ba tanoy cadim anton rumber. Kaikion, kas me kival da krupretel da Mandres tir evakaf ? Kas kiblara va lelistafo vox lomilton mempo xo me co tir ebokafa ?

Battode va int kagrupecké. Djupojara va raltada bak toloy aksat askir da va arak ke aksateem vulkú, isen kiblara va Mandres va wazdera va sedieluca ke cinafa rena dere vanburer.

Jontikviele, yontason va gozara ik ganera, koe F- me sielestú ise do Marthe zavzagí.

Lankielon, va yikye dem severostasikaf aboz poke ine trasí. Inye tir kosayik. Marthe, somerinune, ranyar aze va jin ben berga kutcá. Kosayik va jinafa vustera kicegar. « Lente Paul, mecoba gokivana, renanye, ~ ine kalir. ~ Va kotcoba al pwadé. » Zo argé neke zo vecá kiren Marthe pu kosayik al welidar da va jin renar. Bat yik, mempo is foktaf is anton trakus va dilintaf mevertotaf tantazukot, gu bata rena zo nufelber. Va lionaranya tove Jacques krupter, i tove Jacques vligun kir metis severostasik ik zazdusik.

Paul va kota rumeugalafa etsa ke bata matela wetce kaatoexo divrozar. Pegaf gu bata prilara wotron nedisa va Marthe, bibé. Miledje va gabentuca satolé. Kire kadimi rumeugal tí nume va megрупена vefara ke gadikeem me rovulkú, ont kiren milgik va mana vefara somenamir, ont kire gu merotaruten rotok soguzekar. Va darekeugal ke Marthe tí lickaf.

Viele va bogera ke pilkotik is kapa ke Marin pu Paul kipeson

pwadev, in tubruvayan va intafo kaelikaxo koe Paris drager.

Katcalá da Marthe me rovewelidar da va belcafa blira guzekav. Pestalev da in va cinafa rena wetce deasera bristur, voxe ba bilita do idatcol eviegatar.

Marthe vol benazegar aze zanoler. Kwikeem ko tawaday do Grangier W^{ya} al mallapid, kiren Marthe xeyon al espur da bro Robinson djablir. Inaf gadikeem, folison va berpotkoruca ke nazbeya is teca oviskuca ke berpotkorik volkevkalin, va ine antafe al isker.

Bene azega jontikedje zavzagiv. Paul va tel lofrac tirac jontikote vanburer. Tiv itupaf voxe ape fure fu batcev, kiren Paul linular odiaxik va betafa foredonera. Va Jacques balger. Amlitason, va inafa mewervuca laxubazé ; batdume va vefara kazokevé lodame va bat delvejaf kosayik co pluké.

Viele va bartiv disukev, pune ironokaf impadimak su malnir. Marthe va ilava drager. Paul naler. Va Marthe disuké maninde ine lopekur : « Arse, renanye, zavzagil. » Bidgeson lité da dene int tigí, wetce yerumanik ke Marthe, ise va kosayik ke yerumanya vedgobé, viele moe pikay ke cinafa mawa Paul va cin sielkiavar, tuwavapon tcorkutcason va kosayya.

Ba tena ke lardeaksat, pestalecké da bulura va bata mona tir bulura va kaluca. Arti ware abic aksatany, va rotuxadasa blira oku ageltucafa gokiblatav, tison lieke voltrabiangaf. Lardefiste Marthe gan gadikeem abdi koblira ke nazbeik me zo jovleter, pune tere rovebabré kase va Grangier W^{ya} gu nazbera al abdiwalzer. Gue kalir ise va Jacques al abdiwalzer. Rovorabaté da pu jin dile rotuxadar, kiren bak alubeaksat, moi dimlapira ke

Jacques, al vogar da sin me al ilagiyid.

Miel lolowaveon dur ; isen sielfeda va cinyona gozara tatcer. Wira va sint koe J- tir medrikafa. Enide bilita me di vinustar, pune bro dubiesik goxelkarsav ise koe vawila va gracera ke kot Marin yasik is tela ke pilkotik gopitcav.

Gabentuca ke bat saneaksat, tela ke batyon sielcek fedaf vox fentansaf gu askira va tey, va cin mali alube bartiv pirdad. Dene gadikeem, koilavara bak afiz va akolera sugdalar ; batdume bata ilava ba alube bartiv va jin memper. Me rietá da kon artan dere co rotigir. Do Marthe tí antaf, senyes, meliziwes, vanmiae tegirafa tamava. Marthe tir lebafé, biwe rovedisuké. Kas kle tí stezaf ? Nope tela lodolukafa unera ke ayik toz sidjé. Kire va kuca ke Marthe bloká, kire va inaf jivot vanlaumas wí, pune folkí cidasik. Titi cinafa rena, kotviele va ine bugdayá, kas ine me kaliyir : « Va jin tcalal !!»? Kas cugeke roton me al tcalá ?

Re Marthe mu jin osk tir tel fertik loeke renan neku lokiewon voxosk tir jinaf tanaf dulapeks. Va nik dace me trakú ; craké, volson, grupeson da sin va cin fozanad, aranamason gu cinafa kelda. Bexe, malyedad da fertik tid rotabin is volbagaliaf gu cin. Batcoba sotir minafa antafa giwara. Viele me tir batinde, rovanpid sinaf.

Gadye toz zo vuder. Voxe larde va jin kev intafa berikya is gadya kotviele al konendar, pune me djunuvelar da dimkalir, nume gu sina va int toz kavangluyá. Pu jin, dun dakter da va jin gu Marthe en djuprosolparsar. Va inaf gadikeem ik kurenik fu walzer... Voxe direvielon va jin gunuyar.

Va inyona axaca diepilé. Impavantá. Rovedulzé. Va ine anzá

milinde gadya is ziavya culimed da gaverson rictelur. Kas me al djumer da va Marthe rungrupeyé ? Silukon va int anzar. Folvaf alpoz koe mona pridur. Mana tula pu jinafe toloye berikye ! Gadye ixam abdiwir da va mecoba rodulzeter lanviele sin gu intafa volugda nope tela jinafa vengatad.

Batvieli va fiaera al gestir, voxen gire gadya va twadaalara onser. Va tadxela ke jiz xultuson vanburer. Marthe va cinaf stekeugal isu nazbeik pulvir !

Gadya va jin gu pintik wan krupterser nume va kon veynazbeik vol guzekar. Vol fogetir veygadik ba intafa klaa. Sopron, sedme ina batcoba tir to tela lokiewafa wazdera da bat nazbeik tir volke jin.

Telduca va opapafa pestaka dile kazokever. Gadya, nope intafa telducapa, vol rodoster da kurenikya va kurenikye ortar. Mani tegi va gruspera kaatoer maneke batcoba vol tir rena. Ede tí fertik ke Marthe, pune batcoba sedme gadya sugdalar da ine va aryon dikir. Gadye grupecker eke mana ovara rotir rolafa neke skalteteson va jinafa gloga is titfitison va Marthe vaon faver. Levgildar da ant tí megrupes. Dulzavá da ine golde intafa rena mu jin batinde zo emodar. Gadye, medjumeson da va batyonu nisu belundá, ruyecker da sinu va cinafa skedegara is dace inafa kurera abdifiyid.

Va bagaliaf lentor mu cinafa mona al vider, voxe re va wontera drasur, numen kotviele mali konak viel me al dimlanir, pune va kwik den Marthe stakser, dem lipi dirgasi va jinafa kwitafa dimlanira ; edeme va jinafa yatera pu ardialxe co dakter ise va L- W^{ya} nope dantera va pinepik co di malyegar.

Marthe va laviaceem giwodar, nuvelar akoyene, pu kwik kalir da va anamplekuxa ba jinafa taneafa worara deasatar. Kadimion godimlaní, rotapsason va klaansa. Va int vol ropasú. Gadye is gadya pu jin me kopulvid. Va mwak kaljoxá voxe va mek teliz icde pinepik trasí. Ton katcalafa mejiluca, me folí da jinafa linulara ko gaaxe rostar. Tere, giopon puskeyeson va mwak, kan *Grand Larousse* xadola dakí lize va teliz icde « Pinepik » sanon belí voxe va mecoba tikisa va cin kosmá.

Direvielon, gadye va jin nuyaf gire isker.

Mu kontan co koaneyas va vrati ke jinafa divulgafa linulara, ton baroya conya vildé : ine isker da eron rotegí. Azon tir kinokafe. Dratcer, yatkafe kev int lodam jin. Azon, kinokuca nope zidera jupar da ine fexanyur.

Grangier W^{ya}, ina, ba dimlapira mal tawaday gan arlafa bibera ke yon vegungik al zo elogar. Nujifolison da tí berik ke Jacques, sin gu cinafa dofa blira kocenkad. Larde, ostik, Marthe va jinaf yolt icde betcoba vol latiyar ike va koncoba jinon askiyina iku kaliyina vol lamunester, inafa gadikya va geltrafa ilkuca ke berikye ke Jacques fure sonker.

Wan ixer, laner da nazbeik fotis ke Jacques, va skedegara tenuketer. Va mecoba pu Grangier W^{ye} pwader, kivason va vinustara. Voxe va bata tixoluca gu gijuca ke gloga krupter, i gu gijuca gowalzemba va Marthe gonogrewatase. Enide pu nazbeya wazder da va kotcoba gruper, pune dun kugdar, levgildason dun pulvir, vox fofkapon eke Grangier W^{ye} djiar da kurenik va sintafa nazbeya volgunafa di fromer konakviele ant do in tigr, i va nazbeya tere enromplekutuna gan batyona

gronafa levaykara. Grangier W^{ya} kan kicegara kevon dulzer maninde ine mbi levgildar da nazbeya al kowelidar.

Bata tila is inafa tela darefa bal taneafa jonvielera ke Jacques, plataed da folí da Grangier W^{ya} lente kurenye is arnazbeik va Marthe co gwer, kore va nazbeya vol co vanovar, ta tanafa keldaskira va kiovundara va sin. Sopron, Grangier W^{ya} va Marthe ortase va kurenik mafelar, da wegayeson ok merovoskuyuson meviele al rovebaskir. Nazbeya co jaxadar da ina al tir megrupena, ~ rotir folir. Trawon klokusafa, anton sater da nazbeya va jin tise jotapafe yikye volrodegildase va « ayikyafa gedelUCA » renar.

Lacombe yasa, leleon worana gan Marthe, va mecoba uculer kire koe Paris irubar. Neken, Marthe dun nutir abidafe nume ilpuver. Ina va stekeugal dwir. Nuer dacoba bata exoma arti abica tanda titir. Kota gadikya, nope nelkot, va kurera mu nazbeye sokuranipir neke va naranikya vol vanovar. Kle gadikya ke Jacques va batman kurenik dun tamar. Luxe Lacombe nazbeikya, dalafa lazava ke inafa bulbinara tir kiren Marthe ant va birga ke rezatc dagir, i ke rezatc vanplatipiyin bak idulugal edje ina va Jacques kene bira rungrupeyer. Bata berikya va orikapafa stekeuca pu exoma dun abdikalir, ruyeson da Marthe va Jacques ortatar, isen batcoba xuye rotir ixam al dilizer.

Ubzera ke kurenik is nazbeikya dile vebar da Lacombe W^{ye}, i sintaik karolas va Marthe, zo divazegar. Bam, gadikya is nazbeya va sugdalasa disukera zilikeved. Tela ke Lacombe W^{ya} muxar : « Wil, pinya, mankane manteca ayikya va minafe ayikye grukodiwar. » Tela ke Lacombe W^{yama} : « Me tí tece

Marthe to batdume me lajukuré. » Ae geltron, bata kimtikya volins dun askir da rotis kurenik yater, golde yonta vas « are sare numu lida » is larde kurera kare savsafa cava mea zo zolter, is vanyeson tcumivansafa. Inafa pokolera va kurera jijar liedje piludaf cadim tiskir. Yone yikye abdiplekud da ba tigira koe Paris va Lacombe W^{-yama} di jukud. Voxe azon va meka blisa sugda vanzilid. Dalaf famint ke Lacombe W^{-yama}, sure edjitisa gu leca ke Sainte-Catherine, rotir tir da Marthe va kurenik drikarson al trasir. Va int vinur unt kalison da ant akoydik bro berye al zo rovogralomber.

Neken, nekev beta uculera ke kota yasa, metan trakur da nazbeik ke Marthe va Jacques wetce gadikye me co tikir. Batcoba va jin natcupur. Lanviele va Marthe gu nyuduca dace kagá kiren ine men al ageltur. Larde va axuca anton tisa jinafa kotliz dun wí, isen larde Grangier W^{-ya} va toza ke piza tuflovar, pune trakú da ina kali tena itabudeter.

Xefto vanstir. Gadye dratcer da va yona twa pu Grangier W^{-ya} fu stakser. Co djumé da va dratcera skur. Azon undé. Grangier W^{-ya} va twa pu kurenik co di palser. Ostik, dulap ke battel is bantel tir da xefto me toz dur. Numen belké. Va bata dura rozá. Va batyona twa, jinafe gadikye to pu Jacques gogoler.

Ede lanviele pu jin vudeson co kalir da batcoba co al zo askir, pune ben berga co grablé. Adim ! Adim ! Va jin co zanar, givason va Jacques gu coba gogrupetena. Temá da gadye folir da jinafa rena co tir axarsafa. Ison, bata twa va telyona ke Jacques tukrenugawes tove cinaf nazbeik co tenuked. Jinafa vozera tatcer da va oviskuca ke bati tegi isu merotira rogildá.

Biwe toz wickí viele direvielon gadye lovumeltafe, movuson va rotuxadara, va jin fokaravaldar. Karolar da ina tir volayafa. Efe. Voxen toklize aye is volaye tigid ?

Va noglafo po ton nyuduca is pirtuca puské, kuncanon gan kunoya kevkalira ke jinafa klaa ebiduna gan ayikyefa stuva.

Rena va kotcoba ke jin me tisa Marthe gripestar. Cwe gadye me romejer. Va kotcoba rolapon is pinapon malyedá eke tere folí da geja wal ine is jin tir. Batdume va jinyoni nazbeafi goni nugapé, osk nope rena mu Marthe voxosk dile nope djuzauzera, gomovú.

Va twa ke gadye staksena den Marthe ilobrá. To ine dun voser da ko mona lofereon dimlaní, da becú. Kotviele dieviégá : « Kas rin dere va pako kev jin fu naral ? » Talgalicá, nugadendá. Kotviele maninde linulá, trakuson da ile ine konakbartivon fu tigí, pune Marthe va sugda ke ske torigir. Laner da zo renar nume tir acafe dum meveli. Laneson da va dalint di trakú, karakter enide di dimlaní.

Kalion sonké lizu inafa takreluca fir. Va pendaropa toz betá. Nope inyona lazava nujidunú. Bam, laizon, ine va ara vola narara. Wison da tí maneke proyaf (ok foktaf), kivar da leeke di rená. Silukon voser enide zavzagí, zo godegrivudesipir.

Neken, lanviele, mecoba tcedewer. Mali ixam barka, den gadikeem me al laní, ise pu Marthe ruyé da va tanoy mielcek do ine ware djutiskí. Va kotcoba yovar enide va jin gu bata gorara danter : va santara is dratcera. Silukon dace lajustetar. Tere dakter da, ede den gadikeem me di denlaní, pune dene tel intaf kenibeter.

Dulzé da gadye va bata zatcanya mu ine me nyurnatar. « Kle, xabe ! » Ine den gadikya me lanitir. Pok Marne kuksa lanitir. Ve fenteter aze mulufteter ; adim gu jin zo tunuyatar. « Icle va minaf nazbeik saal !! ~ Marthe kalir. ~ Va inafa blira ins me rotplekul !! » Kagar da gu dalintafa rena va int deasé, da va kima djugrupé. Kev mana karakera, va draga ke gadye gin kalí : « Ine va rin do bettan ortar, voxen me zo resteté. » « Antafa lazava, ~ kalí, ~ tatcer da dunul. Resielon va tan fertik vedgobel. » Va tokcoba kev mana malyaca co rodulzer ? Mangir. Uculé da nope situndara me welver. Tere, jupapá eke va mielcek do jin djuprotiskir. Ant ede batcoba dene ine me fu tir. Ine vol gruper da pilkotik pu staksenik ke jinaf gadikeem direvielon co rokalitid da banlize tigiyr.

Toklize fu kenibev ?

Tiv rumeik ranyes moe rova, oklaf da batkane sotre tanoya taka tiv ontinaf loon dam milgik. Goaspil va cin ticapted, voxen wan tiv merogrupes. Ison, ede nope cinafa volbagala konakcoba esafa sedme cin nutid opelackafa, pune voxon arcoba opelapafa vanpir vakor. Va kaelikaxo ke Paul meviele al rovezaniev. Me trakú da pu lipoksusik co ropebuv da dile di laniv, kore va talolk co fargiev.

Kle koe gida fu gokenibev. Mevieli al laní. Trakuson va kaiklanira va pikay, skotcé.

Rumeugal va yonta sokaneyar. Larde pu gadikeem dun govengar, pune soye rotuxadar.

Dace tove unenik ke gidaja, guzeká da fu govengá. Batdume, yontason da abicote grita is konaka xa ta tcaterra olegatav, vebá

da Marthe va zolpa egar. Va toloya mawa erutuv. Bevulatav berik. Va tanoya mawa co vol roveberú, kiren jinafa klaa va jin gu plukera konedir, ba klaa ke aloyara div liwuxe.

Koyara ba sielon san-tane bartiv tir teniskafa. Toloy korik koe omaze tigid : kurenikya dositasa va kurenye redakik kal Est golda. Omaze me zo tuidualar meie zo koafir. Marthe va taka kev abdafa ralpa winder. Va rinta ke udutafe sardikye levgar. Tí kinokackaf ise mejedá, trakuson eke Jacques loon dam jin va rena co riwer kire dun tir krenugaf tove ine.

Vol lavengá, pudomason. Ine takabotcer : « Abdualbá, ~ prejar, ~ da di tí volkalaf do rin lodame kalaf do in. » Manyona renewa va koncoba somesugdalar numen tí kinokaf gu munestera, neke tuizakad kire gan renan art zo tiyad. Va blayak ke Marthe dace fogildá. Neken, in va tokcoba dye sugdalar ? Kaskase tit kalaf do kontel merenan ?

Isen nué, dun nueté, kase rena va ayikya gu bali rovosoltiolter, i gu dilintafi bali rotir rotakafi nek wiyapafi. « Abdualbá da di tí volkalaf do rin... »; kas bata ewa va mejilafa culimera donarid ? Ape. Kiren Marthe va jin renar, pune va yona kalaca do jin fu ugalan, i va kalaca merietayana do Jacques. Voxen kas bat kalaf gemelt rictad da tí udutaf ?

Koe Bastille recela volrundanyav. Va fent tcizá kire folí da in tir tela loparvuafa coba ke tamava, voxe koe bate goldagijaxe tir zionaf loon dam idul koe biramolt is a lumisasa itupuca. Marthe va deza temer. Va jinafa ma nubagir. Kimtafa tolona, vulkusa va intafa listuca isu jotuca, kinokafa gu int dum wipitesikafa tolona !

Krupté da nazbera ke Marthe tir kipeafa, nume itomason laní. Ton gadikyefa intotcuca vol tí.

Leve fentapafa muvara wale Bastille viga is Lyon golda krabev. Ba kota gida, mekolanitison, va pararaja gandú. Pu Marthe kalí da va xariafa gida aneyá, i va koyasikafa gida lize koyasik anton co tigid.

Moe Lyon golda viga, mea rovokrulá. Marthe granser da va bata rejdera nonú.

Edje diveon ker, va zeria kolaní, awe djupotrasison va koncoba. Unenik erur kase va mawa jugemé. Enkalira co tir drikafa. Batcoba dye tir drikarsafa, numen, aneyason va parara bro onsen gidadubiesik, va Lacombe W^{ya} erú. Tukeraweson askí, kivason da in fu dulzer : « Kas nulel, yikye ? Ina koe vawila tigur. » Va vertok ruper. Va mane ape roklá. Divlaní, pebuson pu Marthe da kona runda mea tir isen koe revava va meka fu trasiv. Gin gaelé. Ton yates dubiesik ampú.

Sure, jinafe ne ta yategara va batyona gida liz va Marthe poason stayá, tatceyer da va ine trakuyú. Re, va ine disuké, i va kimtya. Va ikuza kagí azen viele ine erur liz va ilava fu aneyav, pune vosé da va akolesik me fu sater nume proyon fu dimdenlaniv, ine ko J- is jin va gadikeem. Akolesik ! proyon ! Gildeson va batyona volebokafa ewa, balkon kicegar.

Jinafa kinokuca va dimdenlanira tupizar. Kotviele, kaiki tecbatyona udutaca, Marthe goxe kalir : « En tire, al trukul ! », pune perlé, krupté da tir medisafe. Volson, ede amlitar ise nuvilsetiker, pune toz vudé kiren batinde co tegir kire co krupter da tí akolesik, i bakestik. Battode dun jupá da kalir da me

ilsetiker isen kore ixer, pune va inafa koxuca soe gomeimpavantá ; lanviele titir legafe gu jinyona askipera numen inafa arga gu cinafa rena watar, numen ine va jin tuantatar. Kotviele poá da pu jin kan mana fa pulvir, ise kore va intyona dratcera me folí, pune va pluktaf kranav satolé, i va kranav rodolunen vox pof loon dam kontia nekina gan stoyembela. Bam kotviele va Marthe ipé aze skeuson loon dam meviele kutcá.

— Gire kalil da va jin bulutul !! ~ cepiteson kalí, is loeke dabluson va ine.

Gruideweson bro tcelmasik vols bet levetirik, is puveteson va jin, ine va blayak inton volgildan tolkalir.

Bat mielcek dem gida tiyir gorukaf, voxen kaiki jontikara testaca di sonkensé. Neke ede foliyí da varafa blira maninde soketer, pune Marthe, puskene is nolyene is talgermitase koe alava ke dimstase omaze, va kotcoba luxeon ve naruyur. Dace rotir, koe direm oviskon stan, arti bata tandafa lidixaca, ve wiyir da ant awalk di tiyir tenulera.

Direvielon, va Marthe koe ilava trasí, dum gubeon. Djukazokevé ; ine malplatir, krenugon. « Pesté vijis, ~ kalir, ~ mallanil, pokeon me zavzagil !! Bas jin fu ermialel. » Bober, vozer. Menuculimeteson, kiceson kalir da darevielon ape al fenter. Nekev radeyera, weyonar da va kurmik di kevlaní. « Xabe, ~ kalir. ~ Idulon anton godezavzagí. » Tire, va jin den kurmik me djustakser kire tove bat abrotcif yasanik va int me djurotplekur. Godegrivudé maneke vewara ke Marthe va jinafa dwira deswar. Ina gin tir, lagoon dam kabdion, viele ba

mallanira ta sielestura dem gadikeem, Marthe erur kase va kelda di rotaranamá aze va twa den kurmik di dayká.

Direvielon, artlanison va mona ke Marthe, va mil kurmik koo fogelom gamdá. Me rovekoerú ise wesidon disuké. Inafa vumeltafa tiva va jin dramgur : batcoba anton tir ebafa tila.

Den Marthe kolaní. Toklize ine tigr ? Mawa tir vlardafa. Marthe borer, ton taka preytutana leve moek. Kurmik al kovebar da ine koe mawa kali radekara di gozavzagir. Ison, inafa vira va trumara diner ; ine dene gadikeem gozavzagir. Zo solparsav.

Volkaluca zo somenaler. Ant kaluca zo nudanur. Dosteson va bata meexuna solparsara, vanyé metakrelaf. Opelón, me gildá. Akoydaf, va yarduks ke kurmik terektá, dum lanzanik va restali. Ede in me tuzwawer, pune kalit : « Man takrelik !» Vol, batcoba kre tir gestansa. Viele ta klibura in zo divmodar, bam va restali gilder. Milinde, gildá da va sint mea di wiv ant viele direm stakseyen gan kurmik pu Marthe zo dakter. Metel al zo walzer kiren Marthe al diner da den gadikya wotron di artlapir.

Gransé da direm eze mona ke Grangier W^{cem} zo azavzar. Ba bareafa rwodera ke diremstasik divrundanyav. Battan va cinafa bareafa kutcara folonser, voxe va mila tire onser. Egayason va mecoba ta direfa daalara, is kalison va vuga donera, va Marthe bulú, dumedede arti tanoy bartiv gire fu kevlaní. Ixam rilitafa vegungikya kak dilk awid.

Gadya katcalar da tí ton tuckeraweyes iteem. Berya kipegad kire jinafa aabreforia tolon kaluber. Azeba opser. Ta mejera va totaranuga me dí. Ostik, cwe, ant mana fansila ke takra ik gloga gu biramejera zo rodoluner. Blira voldo Marthe titir abrotcifa

remlapira. Kas fu jupaskí ? Dum ba taneaf prist ke biramejera, va artlapira va molt sonulet ise batlize djumawalket, numen va direkeugal viunsunsú. Arti konak viel, rotok lion gíaf va ugal ta trakura va siday mu jin isker.

Gadikeem ke Marthe va cugcoba al diepiler. Va jinyona twa riander nume tuvaleawer. Kabdue ine va sina koe keldega ke inafa mawa moanteyar. Inafa twa kan ogalt zo suted nume tid biwe robelina. Inafe berikye gikopiuter.

Va yasanyalera mea gobosolá. Kabdue tey va gadye sielon gin gipirilanyá. Arti tanoya tanda, sedme kota berya al vanpí diveik. Sina va int gin grigovitad, gu jin gin giltaved. Va tela ironokafa mo bade narí, aze impavantason va orika tizapon licar eke ina kipeson is boreson kuzur. Va jinaf nazbeik trakú voxe tí gabentaf. Cwe mekase co tí toveon loon krenugaf. Kas tí lukrackaf enide pintik me co tir tec berik ?

Gadye pirdar da suské. Mana pirdara gan auluca zo nekid. Va tokcoba gonaskí, vaxe coba mea askitina ? Ba kota lorara ke mamlesiki ik pokonira ke direm skotcoté. Koe jinaf flint va beta tunuyasa tcala pitcá.

Tre pitcara va lorara rodaktesa va koncoba, lanviele jinaf oblakeem va biotara gilder. To telyona ke gejatenggara tid.

Sedme jin, gejatenggara va dimlanira ke Jacques sugdalar. Ixam va in drume Marthe wí voxe mekane rotegí. Tí buktaf.

Gadye ko Paris dimlapir. Kuranir da doon dere dimlapí : « Metan va mana jora rogracar ! » Me rovevewá. Kivá da fu nutí rostaza. Azon, sopron, koe jinafa volkalafa boluca, wira va

daava ke korikaf arak me mepuveter.

Kas ronomovú da jora jekunsur ? Pesté ant rosatoles va pestaka fotisa ke tari. Va gugafamuca aneyá. Jinafa memalyuca, rotir, va saipuca ke wotraf udor anton nedir : zazda tid lowaveon runkafa, sayakikye va yikya ronokutcad. Al trakú da bata disukexa va jin di vanmanar, di tulickar ike dace di deaser, uzertanon gan lugodafa pestaka, neke bro beta Sainte-Catherine jora argar.

Mali konak viel, meka twa artnir. Ba tan ríaf kiel viele nolda dumur, berye va staksa ke Grangier nazbeikye pu jin bulkad. To tufentapasa twa ke Grangier W^{-ya} tir. Djiar da va ina vere di denlaní. Va tokcoba ke jin ina rokuranir ? Va intafa bemuuca soe belkusí kire poke Marthe dace merontion di rovotigí. Va Grangier W^{-ya} gestí, i va ina pouna da va nazbeya gire wítí ike daalatá, solve dum ravesikaj takomason co kevterektatá. Tití volrovinustas ik volrozides isen meka zatca va jinafa bogera exaksatar. Dolon kiavatá, azen tuvel kotvieli zo budeter. Bam, va dulzera is volfonkafa dusiva is fezasa ewa trasití, i va kotcoba co deasa pu Grangier W^{-ya} va ewava ke fertik va inaf nazbeik, i va ewava seitafa leon dam tela ke bet onsen reilik. Va nakila sotre verast abdiwí.

Viele va bontama kolaní, va jinafa taneafa worara gire nuvugalá. Bana worara bam sugdalayar da konkase va Marthe mea gire di wiyí.

Grangier W^{-ya} kolanir. Nope inafe ontineme ikaon mejé, kiren ina lasutir calgafa. Parar da ta mecoba va jin al mazuker. Espur da seotason va cenkaxa wavdarsafa gu sutena erura, va

bata staksa al stakser, voxen batedje vaon al dadir. Bata solovafa bula lodam betara skaya va jin olyaster.

Poke Marne kuksa, va Grangier ironokikye altogise va polku kevlaní. Ine va noldafixu ko vola su kazawar. Boredar. Marté, gu Marthe bibé. Kalir da berya va jin dun rozar. Gadikya vol djugildar, voxen gadikye al kalir : « Marthe cugeke roter, diné da zo vejer. »

Tanveraston va glastedafa is divulapafa linulara ke Grangier W^{ya} gildá. Tarkatason va kurenik is kuranira ke awalkesik, va jin al rozar. Voxen kadimi elogara, nope Marthe gire galafe is vawelafe, gransera al zo dimnarir. Co gowauné. Batcé da deona me al slar numen va akolesik co rowí.

Arti toloy viel Marthe pu jin suter. Va jinafa worara me aflar. Ina ape al zo riander. Marthe va cinaf direkeugal, kan anulaf kom wiyaf is keltaf skaltemes va jin. Kas ageltaca co tir da rena sotir lotizaf tazuk ke ketsuca ? Kiren, aneyason va lazava icde jinafa skaltera, trakú da tí lickaf gu cinaf nazbeik re dure keyaksen gan Marthe.

Va in bal bareaksat kev. Ba lan teveaviel ke taneaksat, jinafe berikye cepitese dakted da Grangier jotik va nutikye re dikir. Va sinafa xultusa tiva me gildá, meien dume maneke al vulted. Efe va cugunaykuca ke warzot mu jin me vantrakud. Voxen sedme jinyone berikye, kone ziavikye tir klaackik. Acum ede Grangier jotik tir ziavik, pune batcoba tir zulta, numen walzilitison va intafa skebura al vanvulted.

Plek dure tigis leve ita wavdapon zo sokagrupe viele zo arplekumur. Vey nutye ke Grangier jotik, va nazbeik ke Marthe

vere me kagrupé, i va jinafe nazbeye.

Wemoyera koe sanegaxo va radeya sonekir, jin vere tí mano xo. Laizon, ebelte koe jin dur. Koe bat miel, jinafa pestaka va sint nolied ; va int aneyá, va yona evla isu elimaca uzeustason kalaneyá. Mo gelteem patá milinde va Marthe askise dile al wí, banugale meuculeson va ine gu relmera. Ison bata ksubera tir favlafa gu mecoba. Mea rodepatá. Tokcoba bat nazbeik ken bak bareaksat vox koblis bak taneaksat tir ? Latrasin pebureem va bata mepreksuca gan to jinafa lickuca zo kaldafur. Vere, jinafa lanera tickir. Bat nazbeik tir vey Jacques. Kas weti lerdoy aksat va udorcek me al tiskir ? Batinde, banvielu, Marthe pu jin rotuxadar. Ison, va bat udor ixam al rotuxadar ! Kas taneon me al kalvogar da remi ban san-aluboy rotapsan vielcek va Jacques al beldar aze vamoion al movur da konakviele ganon al zo ilagir ?

Me al trakuckú da bat nazbeik co rotir vey Jacques. Ison kore titi nazbera ke Marthe va mancoba konkase nyudon al jugemé, pune fotigison lente merobetane is konakaksaton kovdayanon gan lanera va gaduca, re en gomovú da va bat nazbeik rená, i va nazbeik me tis vey jin. Tokdume va gadikyefa takra fodí viele zo givá da me tí gadik ?

Rabatec, tí ton merofolina gojuca is dum mielon mimayan koe lava vols grupujes. Va koncoba mea gildá. Nelkon megildane tir to pirduca ke Marthe ziliyise va jinaf yolt pu bat mwedaf nazbeik. Dile va batcoba gu budara krupté, i gu budara va diweda jupayasa da bat nazbeik co tir jinaf ; arviele va milcoba gu wervacansa anton krupté, i gu karolaraja ke Marthe milafa gu telyona konakviele lemisteyesa va jin vox anton tisa

slikafa renasa tcala.

Va lutsagasa twa tozú. Fodanú, nope bagaliuca ! Voxen ravlem me artnid kiren jinafa swava arlize tigr, koe loon olukafa gola.

Va twa sollipá. Va ara suté lize jinafa takra pulvir. Pu Marthe ixedá. Va tokcoba ixedá ? Ape kiren bat nazbeik tir vey Jacques. Vosé da ine va jin soe wan renar.

Ayikye jotapafe sotir sulem tcumivaf gu kranav. Ixam va intaf ervay arinde iksantú. Va bat nazbeik vey artel riwe levnalé. Voxen abdi dace tenura va twa, va kona daavapafa ke Marthe kazawá. Bat nazbeik en tir cinaf, kobliyis ba toloy aksat abdi evlacka. Ko cwasiko zo gorundar. « Riwe al xonuké, ~ ine kalir. » Bat blayak dum velaca va jin kicesir.

Kiren va runda ta daava me dadí. Va bat warzot pu varafa tamava co djukalgolé, pu berye co djukalí da sine dere tid zivik. Ton daava va int vligú : maninde va Marthe al rotiltrakú ! Bata sidjera aotcafa gu jinafa kaluca askir da loon dam meveli va ine rená, is va cinaf nazbeik dere. Tison mesapaf, va vligura kumzilí. Areldon tí valeaf kire va kranav abicedje su rungrupé. Icle, folí. Voxen va plek, mecoba leon dam coba pokepon tigrisa sovektar. Ayik riwe awalkeyes va awalk fogrufer. Somekagrufer lanviele va int puon tere atoer : « Volto in tir, ~ miltan kalir, awalkeson. »

Koe twa, Marthe pu jin ware kalir : « In va rin vektar. » Va yon koblisik ixam al wí, i va berikeem, ise al grupé da ant rena ke ayikya va djumena vektasuca rokosmar.

« In tir dem jinaf iteem, ~ loplekur. » Isen ant inafa jugemera va cinafa katanara koe tanoy tisik jupar da va intaf iteem kagruper.

Dene Grangier yasa, beta etrakara mea tir. Sin va Marthe rotapsad voxe vanpid dofugik, enide bilita va yasa me di « bediblar ». Tel kurmik, i ar dofugik ke vura, palsezon da bata koblira tir abdievlafa, kan kota kuda pu kurenik, va pebura icde olegara va cwasiko vajuleter.

Bak yon diref viel, krupté da amlitara ke Marthe tir tuwavafa. Jacques pokeon ape tigrir. Mekar udor lodamu bat kseran nope koblira ke nazbeik va jin al vanolar. Ton bocafa sardafa vagrablera, dace trakuson kicegá da in va bat udorcek gu jin to danur.

Cinafa mona va auluca divdaaker.

Ageltafa abdipestalera koe aludeve someworane gan minafa swava sotazukawed. Acum, dile, askid da va yona tegira kotkane narujuna raplekut.

Folkí loon krenugaf nope jinafa kaluca nume wivé, grupeson da Marthe koe mona artazukana gu staga gan jinyon kalaf setikeks tigrir.

Glusik fure awalkes vols abdigrupes anameon laizon toz vur. Inafa blira betawer. In waveon toz ranyar, megaveon toz senyar. Va fogra koebgar. Pokeikeem sendar. Acum inafa laizafa awalkera nutir volmalyarsafa. In kalon fu blir.

Milinde, warzafa auluca ke jinafa blira tir lanzanikafa tcatera. Fogetí lokiewaf nazbeik kire vaon dikí. Neken

krenuguca va jin gu gadye vanplekur, is gu gadya kiren koncoba ke jin gruper da va tela sinafa fure olegatar.

Lanviele, ba miafiz, beryeem kou bema artlanir, iegason da Marthe al mulufter.

Gleba lubesa mo ayik sotir wilupaf eke in me mejer. Voxen batcoba tir gabentafa disukexa tove kontel dositas. Edje vola ke gadye solponawer, pune va mecoba pestalé. Ine va kote berye platir. « Divlanic !! ~ neuzeson kalir. ~ Tic oviskaf, oviskaf ! » Jin, pestalé da tuolgawé ise tufentewé ise turaporawé. Azon, milinde verast va kot setikeks ke blira kev ita ke awalkesik sogritanamer, pune lanera va jinafa rena do inafe kotafe steze basitalar. Kiren gadye borer, pune buwejé. Bam gadya va jin toz viunsur. Ton rodaf iteem, fentalon is krenugon roper dumedede nope rumeafa akola co mejé.

Jinafa takrumera va amlitara ke mona remi yon taneaf vielcek pu beryeem pebur. Azon sin mea gildad. Va lorasa vefara mbi poud. Stivawed. Voxen kotmiafizon, sinafa bora moe tilmu ke zeria va jin bindesid dumedede kotviele va awalkera ke Marthe co dakted.

Marthe ! Larde jinafa lickuca va ine kal naboxa radimfir, pune jugemé da mecoba kaiki awalkera di krulder. Acum tigira ke renanik do jontiktan koe kapa sotir beomara, i koe kapa lize me rotigí. Jinafa takra tigrig ucale va direkeugal men trakut. Gue, va to mekak jinon jugemen mu Marthe lodam kona warzafa tamava konviele kazokevetena tir.

Ant lanviele va Jacques kozwí, radimi konak aksat. Grupeson da jinafe berikye va konak lingeks ke Marthe digir, in

al djukosmar. Sotit pegaf gu onsera va bet icdeks ke renan tisik.
Va jukambik ke Marthe al djuwí.

Kagison va gaelera is tranodon avlason, va budeyemen tuvel
vanlaní. Viele fu artlaní pune gildé :

— Kurenja rozason va in al awalker. Kimtafe ocye ! Kas ine
me tir jinafa antafa lazava ta blira ?

Wison va bat nyobrik bagaliapaf is kofelis va piksa, al gildá
da vura anam cobeem artion is darpeon sorundawer. Kas me su
grupé da Marthe al awalker rozason va jin, numen nazbeye va
bliracka ugalatar ?